

हिल्रूगदेदा भ्रिबा चिठी चु चिठीला बाररी पाङ्तोःमा

भ्रिबा म्हिः खालैदा था आरे। डाच्छा डाच्छा चु चिठी पावलसे भ्रिबा हिन्ना भिसी बाइबल विद्वानगदेसे पाङ्मुबा। तर दान्दे पावलसे भ्रिबा आहिन भिसी बाइबल विद्वानगदेसे म्हन्मुला। थेनीगदे न्हडला कोइसे अपोल्लोससे, कोइसे बारनाबाससे, कोइसे लूकासे, कोइसे सिलाससे, कोइसे चा स्यूहान्दो म्हिसे भ्रिबा हिन्ना भिसी म्हन्बा मुला। तर खाल्से भ्रिजी भिबा ताम परमेश्वरदा बाहेक स्यूहान्दो खालैदान था आरे।

भ्रिबा ग्लाः पक्का था आरे, तर कोइ कोइ बाइबल विद्वानगदेसे रोम शहरग्याम तखम्ला भिसी पाङ्बा मुला।

भ्रिबा सालः ओस्पन ईश्वी संवत् ७० (विक्रम संवत् १२७) साल भन्दा डाच्छा भ्रिबा मुबा।

खाल्दा भ्रिबाः येशूदा विश्वास लबा यहूदी म्हिगदेला समूहगदेदा भ्रिबा मुबा।

येशूदा विश्वास लबा यहूदी म्हिगदेसे ल्हानान दुखदेन बिरोधला ताम नातोःबासे लमा येशूदा विश्वास लबा खलाला वा भिसी लोङ्बा मुबा। थेतबासेलमा चु चिठी भ्रिबा म्हिसे थेनीगदेदा आँट पिन्बाला लागिरी येशू ख्रीष्टनोन परमेश्वरला म्राङ्बा रुप हिन्ना भिसी पाङ्बा मुला। चु ताम घोना लबाला लागिरी चु चिठी भ्रिबा म्हिसे गोर सोम सत्य तामग्याम चुहङ् भिसी पाङ्बा मुला।

(क) येशू परमेश्वरला जुकजुकधोनाला झा हिन्ना, थेसे जम्मान दुख नासी परमेश्वर आबासे कुल्बा जम्मान तामगदे सेमहेन्सेन खाहङ् लसी ड्यान्तोःला भिसी था याङ्जी। येशू

परमेश्वरला झा तबासे लमान डाच्छाला कबुलरी पाड्बा जम्मान अगमवक्तागदे, स्वर्गदूतदेन मोशा भन्दा घेन हिन्ना।

(ख) परमेश्वरला झा येशू ख्रीष्ट चा जुकजुकधोना परमेश्वरला मन्दिररी पूजा लबा मुल म्हि हिन्ना। थे चा डाच्छाला कबुलरी पाड्बा परमेश्वरला मन्दिररी पूजा लबा म्हि भन्दा घेन हिन्ना भिसी पाड्बा मुला।

(ग) येशू ख्रीष्टदा विश्वास लबा म्हिदा पापदेन लोड्बा खबा ताम ओच्छे कालग्याम जोगब लला। चु तामला चिनु यहूदी धर्मला रिमठिमदेन जन्तुगदेदा बलि पिन्बा तामगदेग्याम डाच्छान उन्सी जिन्बा मुबा।

चु चिठी भिबा म्हिसे ११ अध्यायरी चु चिठी पढब लबा म्हिगदेदा इस्राएली काइरनरी मिन भिसी थान्बा कोइ कोइ मिन चलब तबा म्हिगदेसे लबा विश्वासला बारेरी पाड्सी विश्वासरी सदन कोड्सी चिउ भिसी बिन्ती लबा मुला। १२ अध्यायरी जस्तोन दुख तसैनोन आसितेधोना येशूदा जे च्यासी जम्मान ताम नागो, ओच्छे विश्वासरी कोड्सी चिउ भिसी थेसे थेनीगदेदा पाड्बा मुला। चु चिठी चा सल्लाह पिन्बादेन होशियार तना लबा तामगदे भिबान थुम्ना लबा मुला।

मुल तामगदे

येशू ख्रीष्ट परमेश्वरला पक्का रुप हिन्ना १:१-३

स्वर्गदूतगदे भन्दा येशू ख्रीष्ट घेन हिन्ना १:४-२:१८

मोशादेन यहोशू भन्दा येशू ख्रीष्ट घेन हिन्ना ३:१-४-१३

येशू ख्रीष्ट परमेश्वरला मन्दिररी पूजा लबा जम्मान भन्दा घेन म्हि ४:१४-७:२८

येशू ख्रीष्टसे लबा घेन कबुल ८:१-९:२८

येशू ख्रीष्ट पापला सय फाबारी क्रुसरी सिबा १०:१-३०

विश्वास चा जम्मान भन्दा मुल ताम हिन्ना ११:१-१२:२९

परमेश्वरदा ताड्ना लतोःबा १३:१-१९

चिठीला थुमरी लबा प्रार्थना १३:२०-२१

चिठीला थुमरी पाड्बा ताम १३:२२-२५

हिब्रूगदेदा भिबा चिठी

येशू ख्रीष्ट परमेश्वरला झा

1 ओन्मा परमेश्वर अगमवक्तागदेग्याम य्हाडला आखे म्हेमेगदेदेन छ्याम ल्हानान थरीसे ल्हानान रेमधोना ताम लमुबा। 2 तर चु लिच्छाला धिनगदेरी परमेश्वर ह्हाडला झाग्याम य्हाडदेन छ्याम ताम लमुला। परमेश्वरसे ह्हाडला झा ख्रीष्टग्यामसेन जम्बुलिड सहोजी। ओच्छे जम्मान सहेगदे ह्हाडलान सहोबारी थेदान धम्जी। 3 परमेश्वरला घेन य्हालदेन शक्ति ख्रीष्टग्याम म्हाड्बा मुला। परमेश्वरला रूप थेनोन हिन्ना। थेला शक्तिशाली बचनग्यामसेन मुदेन जम्बुलिडला जम्मान सहेगदे छ्याबा मुला। ओच्छे म्हिदा पापग्याम थार्ना लबा गे लसी जिन्माहेन्से थे स्वर्गरी शक्तिशाली परमेश्वरला दाहिने छ्यापट्टि मुल ठिरी धन्छ्याबा मुला।

ख्रीष्ट स्वर्गदूतगदे भन्दा घेन हिन्ना

4 ख्रीष्ट स्वर्गदूतगदे भन्दा ल्हानान घेन हिन्ना, थेहड् लसीन परमेश्वरसे स्वर्गदूतगदेला भन्दा थेला मिन ज्यबा थान्जी।

5 तिग्दा भिसम परमेश्वरसे येशूदा बाहेक खाइमै खजिबै स्वर्गदूतगदेदा चुहड् भिसी सुड्बा आरे,

“ए डाला झा हिन्ना,

तिनी डा एला आबा दोबा मुला”

ओच्छे

“डा थेला आबा दोला,

थे डाला झा दोला।”*

6 परमेश्वरसे हाडला झादा जम्बुलिडरी पुइखबा धुइरी
“जम्मान स्वर्गदूतगदेसे थेदा तेनगै” भिसी दोःसीनोन सुड्बा मुला।

7 परमेश्वरसे स्वर्गदूतगदेला बारैरी चुहड् भिसी सुड्बा मुला,
“परमेश्वरसे हाडला स्वर्गदूतगदेदा लाबा सहोजी,
ओच्छे हाडला गे लबा महिगदेदा चा मेला ल्हाम सहोजी।”*

8 तर परमेश्वरसे हाडला झाला बारैरी चुहड् भिसी सुड्बा मुला,
“परमेश्वर हाडला यहुल्सा सदन चिला।
ओच्छे हाडसे ठीक लसी शासन लला।”*

9 हाडदा ठीक ताम सेम निमुला, ओच्छे आज्यबा ताम चा च्यागेन
आमहनमुला।

थेतबासेलमा परमेश्वर, हाडला परमेश्वरसे हाडदा धम्बा
मुला।

ओच्छे हाडला होगदेदा भन्दा ल्हाना मान लसी ताड्ना लबा
मुला।”*

10 परमेश्वरसे हाडला झादा दोःसी चुहड् भिसी सुड्जी,
“प्रभु, हाडसेन शुररी जम्बुलिडला जग थान्जी।
ओच्छे हाडसे हाडलान छ्यासे मुदेन मुरी मुबा जम्मान सहेगदे
सहोजी।”*

11 थे जम्मान सहेगदे नाश तला, तर हाड चा सदन चिला।

थे सहेगदे क्वान हड् भोक्टो तसी निला।*

12 थे सहेगदेदा हाडसे क्वान हड् लसी रिल्ला,
ओच्छे थे सहेगदे क्वान हड्बा भोक्टो तसी निला ओच्छे
पोला,

तर हाड चा खाइमै आपो।

ओच्छे हाड खाइमै म्हासी आनि।”

* 1:5 भजन २:७; २ शम् ७:१४; १ इति १७:१३ * 1:7 भजन १०४:४ * 1:8 भजन
४५:६ * 1:9 भजन ४५:७ * 1:10 भजन १०२:२५ * 1:11 भजन १०२:२६;
यशै ५१:६

13 तर परमेश्वरसे येशूदा बाहेक खाइमै खजिबै स्वर्गदूतगदेदा चुहड् भिसी सुड्बा आरे,

“डाइ एला शत्रुगदेदा एला काड धिरी आथान्तेधोना

ए डाला दाहिने यापट्टि मुल ठिरी चिउ।”*

14 थेतबासेलमा स्वर्गदूतगदे चा परमेश्वरदा तेन्बा आत्मा जे हिन्ना। ओच्छे थार्बा याड्बा म्हिगदेदा हो लबाला लागिरी परमेश्वरसे थेनीगदेदा पुड्खबा हिन्ना।

2

परमेश्वरसे येशू ख्रीष्टग्याम पिन्बा थार्बादा थाम्ले:गो

1 थेतबासेलमा य्हाडसे जुन ताम थे:बा मुला थे तामरी झन ल्हाना सेम लसी ड्यानतो:ला, आहिन्सम य्हाड थे तामग्याम थारेड तला।

2 स्वर्गदूतगदेसे य्हाडला आखे म्हेमेदा थे:ना लबा परमेश्वरला बचनरी पक्का अधिकार मुबा। थे ताम अन्छार आभ्रबा पाप लबा

म्हिगदेदा परमेश्वरसे ठीक सजाय पिन्जी। 3 थेतबासेलमा येशू ख्रीष्टसे पिन्बा चु घेन थार्बादा य्हाडसे वास्ता आलनी भिसम

झन य्हाड चा खाहड् लसी सजायग्याम स्योर्म्याड्ला? चु थार्बाला बारेरी डाच्छा प्रभुसेन थे:ना लजी। ओच्छे प्रभुसे थे:ना लबा ताम

थे:बा म्हिगदेसे चु ताम सत्य हिन्ना भिसी य्हाडदा घोना लजी।

4 परमेश्वरसेनोन चिनुगदे उन्सी, ल्हानान थरीला उदेकला गेदेन शक्तिशाली गेगदे लसी, ओच्छे हाडसे म्हनबा अन्छार हाडला

आत्माला मोलमगदे भो लसी पिन्सी चु थार्बा चा सत्य हिन्ना भिसी पक्का लजी।

य्हाडदा परमेश्वर मुबा ग्लारी भोर्बारी येशू म्हि दो:सी फेपुखबा

* 1:13 भजन ११०:१

5 परमेश्वरसे स्वर्गदूतगदेदा य्हाडसे ताम लबा लिच्छाला धुइरी शासन लबा अधिकार पिन्बा आरे।† 6 परमेश्वरला बचनरी ग्ला गिकरी चुहड् भिसी म्हि गिकसे भिबा मुला,

“म्हि जजा हिन्ना, तसैनोन हाडसे तिग्दा थेदा वास्ता लमुला? ओच्छे म्हिला झा खाल हिन्ना, हाडसे तिग्दा थेला सुर्दा लमुला? 7 हाडसे थेदा तिगै धिनना लागिरी स्वर्गदूतगदे भन्दा जजा सहोजी। तसैनोन हाडसे थेदा स्य्हान्दोगदेसे ल्हानान मानदेन जयजयकार लबा मुकुट कूसी पिन्जी।

8 ओच्छे हाडसे जम्मान सहेगदेथोरी शासन लबा अधिकार थेदा पिन्बा मुला।”*

परमेश्वरसे जम्मान सहे म्हिगदेला तहरी थान्मा थेला अधिकाररी आरेबा सहेगदे तिगैनोन आरेबा। तर दान्देला चु धुइरी य्हाड जम्मान सहेगदे म्हिला तहरी मुबा आम्राड्मुला। 9 तर तिगै धिनना लागिरी स्वर्गदूतगदे भन्दा जजा तबा येशूदा य्हाडसे म्राड्बा मुला। परमेश्वरला दयामायासे लमा थे जम्मालान लागिरी सिजी। थेहड् लसी सिबासे लमा थेदा ल्हानान मानदेन जयजयकार लबा मुकुट कूसी पिन्जी।

10 परमेश्वरसे हाडला लागिरी जम्मान सहे हाडसेन सहोबा मुबा। ओच्छे हाडला कोलागदेदा हाडसे याड्बा य्हालदेन शक्ति पिन्बाला लागिरी थार्बा पिन्बा येशूदा दुख नापुड्सी पाको सहोबा चा परमेश्वरदा ज्यबा छोर्जी, 11 तिग्दा भिसम येशूसे पापग्याम फेसी चोखो तना लबा जम्मान म्हिगदेदेन येशू परमेश्वरलान सन्तान हिन्ना। थेतबासेलमा थेनीगदेदा आले आडा भिसी पाड्बारी येशू आपे:मुला। 12 येशूसे परमेश्वरदा चुहड् भिसी सुड्जी,

† 2:5 चु भिबा चा स्वर्गदूतगदेदा शासन लबारी आपिन्नी। तर येशूदा शासन लबा अधिकार पिन्जी भिबा हिन्ना। * 2:8 भजन ८:४-६

“डाइ डाला आले आडागदेला गुडरी हाडसे लबा गेला बारेरी पाड्ला,

ओच्छे मण्डलीला गुडरी डाइ हाडला जयजयकार लला।”*

13 दोःसी येशूसे चुहड् भिसी सुड्जी,

“डाइ परमेश्वरथोरीन भर लला।”

थेहड् लसी दोःसीनोन

“च्यागो, दान्दे डा परमेश्वरसे डादा पिन्बा चु कोलागदेदेन छ्यामनोन मुला” भिसी सुड्जी।*

14 थे कोलागदेला लहुइ स्यादेन काला तबासे लमा येशूला लहुइएनोन थेनीगदेला हड्बान स्यादेन काला दोजी। ओच्छे म्हिदा नाश लबा शक्ति थोबा शैतानदा नाश लबारी येशू हाडनोन सिजी। 15 ओच्छे सिला वा भिसी सदन लोड्सी चिबा म्हिगदेदा येशूसे लोड्बाग्याम फेजी। 16 चुहड् लसी येशूसे स्वर्गदूतगदेला लागिरी थेहड् लबा आहिन, तर अब्राहामला सन्ताननां लागिरी थेहड् लबा हिन्ना भिबा ताम य्हाडदा था मुला।* 17 थेतबासेलमा म्हिगदेला पाप माफ लबाला लागिरी परमेश्वरसे पिन्बा गेरी भर तबादेन दया मुबा परमेश्वरला मन्दिररी पूजा लबा मुल म्हि दोतोःला। थेहड्बा म्हि दोबाला लागिरी जम्मान तामरी येशू हाडलान आले आडागदे हड्बान दोतोःबा मुबा। 18 शैतानसे फसब लबारी म्हाइमा येशू हाडसेन ल्हानान दुख नाजी। थेतबासेलमा शैतानसे फसब लबारी म्हाइबागदे जम्मादान थेसे जोगब लख्म्ला।

3

येशू मोशा भन्दा घेन हिन्ना

* 2:12 भजन २२:२२ * 2:13 यशै ८:१७-१८ † 2:16 “अब्राहामला सन्तान”
भिबा चा परमेश्वरदा विश्वास लबा म्हिगदे हिन्ना। * 2:16 गला ३:७; यशै ४१:८

1 थेतबासेलमा परमेश्वरसे हाडलान म्हिगदे सहोबाला लागिरी धम्बा ज्योज्यो आले नाना आडागदे, य्हाडसे परमेश्वरसे पुडखबा परमेश्वरला मन्दिररी पूजा लबा मुल म्हि येशूदा च्यागे। 2 मोशा परमेश्वरला म्हिगदेला गुडरी गे लबाला लागिरी भर तबा म्हि मुबा हडनोन येशूएनोन हाडदा गे लपुडबा परमेश्वरला लागिरी भर तबा मुबा।* 3 दिमसे भन्दा दिम सहोबा म्हिसे मान याड्बा हड् लसी मोशासे भन्दा येशूसे झन ल्हाना मान याड्बा मुला। 4 खजिबै दिम खजिबै म्हिसे सहोबा तमुला। तर जम्मान सहे सहोबा चा परमेश्वरनोन हिन्ना। 5 मोशा चा परमेश्वरला म्हिगदेदा च्याबा जम्मान तामरी भर तबा नोकर मुबा। थैसे परमेश्वरला म्हिगदेदा लिच्छा तिग तला भिबा ताम पाड्मुबा। 6 तर ख्रीष्ट चा दिमला भर तबा झा गिक हड्बान परमेश्वरला दिमरी अधिकार याड्बा मुल झा हिन्ना। चुदे य्हाडसे लबा आशथोरी पूरान भर लसी लिच्छाधोनान विश्वासरी कोड्सी चिजी भिसम य्हाडएनोन परमेश्वरला दिमला कोलागदे दोला।

परमेश्वरला लिच्छा भ्रउ

7 थेतबासेलमा परमेश्वरला आत्मासे चुहड् भिसी सुड्बा मुला, “तिनी एनीगदेसे परमेश्वरला काइ थै:जी भिसम,
8 एनीगदेला आखे म्हेमेसे परमेश्वरला बिरोध लबा हड् लसी एनीगदेसे हाडला सेम कोड्ना थालउ।
थेनीगदेसे तोडतोडबा ग्लारी परमेश्वरला सेम च्यासी परमेश्वरला बिरोध लबा मुबा।
9 थेरी एनीगदेला आखे म्हेमेगदेसे बोगल न्ही दिडधोना डाइ लबा गे म्हाड्सीनोन
डाला सेम च्यासी डादा विश्वास आलनी।
10 थेतबासेलमा थेनीगदेदा म्हाड्सी डादा बोमो रे:जी।

* 3:2 गन्ती १२:७

ओच्छे 'चु म्हिगदेसे डादा विश्वास लबा ख्लाजी,
डाइ पाड्बा थेनीगदेसे आड्यान्नी' भिसी डाइ भिजी।

11 डाइ बोमोला झोकरी थेनीगदेदा

'डाइ सहोबा बल्पबा न्हबा ग्लारी थेनीगदे खाइमै
वाड्आम्याड्' भिसी घान फाजी।"*

12 ज्योज्यो आले नाना आडागदे, होशियार तसी चिउ। एनीगदे
न्हडरी खालैनोन विश्वास आलबा पापी सेम थोसी छोन्बो
परमेश्वरदा थाख्लागो। 13 तर परमेश्वरला बचनरी "तिनी" भिबा
धुइ मुतेधोना जम्मासेन गिकसेम गिकदा सदन आँट पिन्सीन चिउ।
आहिन्सम पापसे फसब लसी एनीगदे न्हडरी खालैला सेम कोड्ना
लला। 14 य्हाडसे शुरुरी लबा विश्वासरी य्हाड सोतेधोना कोड्सी
चिजी भिसम य्हाडसे ख्रीष्टग्याम याड्बा हक याड्ला। 15 बचनरी
चुहड् भिसी भिबा मुला,

"तिनी एनीगदेसे परमेश्वरला काइ थे:जी भिसम

बिरोध लबा धिनरी हड् लसी

एनीगदेसे हाडला सेम कोड्ना थालउ।"*

16 परमेश्वरला काइ थे:सीनोन थेदा बिरोध लबा म्हिगदे खाल
मुबा? तिग मोशासे मिश्र यहुल्साग्याम फेसी भबा म्हिगदेन
आहिन? हिन्ना। 17 खाल म्राड्सी परमेश्वर बोगल न्ही दिडधोना
बोमो खजी? तोडतोडबा ग्लारी सिबा थे पाप लबा ओन्माला
म्हिगदेदा म्राड्सी आहिन? हिन्ना। 18 परमेश्वरसे डाइ सहोबा
बल्पबा न्हबा ग्लारी वाड्आम्याड् भिसी खाल्दा सुड्मुबा?
परमेश्वरसे कुल्बा ताम आड्यान्बा थेनोन म्हिगदेदा सुड्बा
आहिन? हिन्ना। 19 थेतबासेलमा थेनीगदेसे विश्वास आलबासे
लमा थेनीगदे बल्पबा न्हबा ग्लारी वाड्आम्याड्नी भिबा ताम
य्हाडसे था याड्बा मुला।

* 3:11 भजन ९५:७-११ * 3:15 भजन ९५:७-८

4

परमेश्वरला म्हिगदेला लागिरी बल्पबा न्हबा ग्लारी

1 य्हाडदा बल्पबा न्हबा ग्लारी वाड्पुड्ला भिसी परमेश्वरसे कबुल लबा मुला। थेतबासेलमा य्हाड होशियार तसी चिड, आहिन्सम एनीगदे न्हडला खालै थे बल्पबा न्हबा ग्लारी वाड्आम्याड्। 2 तिग्दा भिसम ओन्माला म्हिगदेदा हड्णोन य्हाडदाएनोन थार्बा पिन्बा समाचार थेःना लबा मुला। तर थेनीगदेला लागिरी थे समाचार गे आखेलबा तजी। तिग्दा भिसम थेनीगदेसे थे समाचार सेमरी थान्सी विश्वास आलनी। 3 दाहेन्से य्हाड विश्वास लबागदे चा थे बल्पबा न्हबा ग्लारी वाड्म्याड्ला। परमेश्वरसे चुहड् भिसी सुड्बा मुला,
“डाइ बोमोला झोकरी ‘थेनीगदेदा डाइ सहोबा बल्पबा न्हबा ग्लारी

थेनीगदे खाइमै वाड्आम्याड्’ भिसी घान फाजी।”
तसैनोन जम्बुलिड सहोमाहेन्सेन परमेश्वरसे लबा जम्मान गे पूरा तबान मुला।* 4 तिग्दा भिसम थेसे अर्गु ग्लारीनोन निसरेला बारेरी चुहड् भिसी सुड्बा मुला,
“परमेश्वरसे जम्मान गे लसी जिन्माहेन्से निसरेमाकुनु बल्पबा न्हजी।”*

5 दोःसी थेसे चु तामला बारेरी चुहड् भिसी सुड्बा मुला,
“डाइ बल्पबा न्हबाला लागिरी सहोबा ग्लारी थेनीगदे खाइमै वाड्आम्याड्।”*

6 तसैनोन परमेश्वरसे सहोबा थे बल्पबा न्हबा ग्लारी अझन कोइ कोइ म्हि वाड्म्याड्ला। ओच्छे डाच्छान थार्बा पिन्बा समाचार थेःसीनोन कुल्बा ताम आड्यान्बा म्हिगदे चा थे बल्पबा न्हबा ग्लारी वाड्आम्याड्नी। 7 थेतबासेलमा परमेश्वरसे बल्पबा

* 4:3 भजन ९५:११

* 4:4 उत्प २:२

* 4:5 भजन ९५:११

न्हबा ग्लारी वाङ्म्याङ्बाला लागिरी अर्गु धिन सहोजी। थे धिन चा “तिनीला धिन” भिसी तोगब लजी। परमेश्वरसे ल्हानान दिड लिच्छा दाऊद ग्लेग्याम चुहङ् भिसी सुङ्जी,
 “तिनी एनीगदेसे परमेश्वरला काइ थें:जी भिसम ह्याङला सेम कोङना थालउ।”*

चु ताम डाइ डाच्छाएनोन पाङ्सी जिन्बा मुबा।

8 चुदे यहोशूसे थेनीगदेदा बलपूबा न्हबा ग्लारी धोना लबा हिन्सम परमेश्वरसे थे अर्गु धिनना तामनोन आते:सेला मुबा।†
 9 थेतबासेलमा परमेश्वरसे निसरेकुनु बलपूबा न्हबा हङ् लसी परमेश्वरला महिगदेला लागिरीनोन बलपूबा न्हबा ग्ला सहोबा मुला। 10 परमेश्वरसे गे लसी जिन्माहेन्से बलपूबा न्हबा हङ् लसी बलपूबा न्हबा ग्लारी वाङ्बा महिगदेसेनोन गे लसी जिन्माहेन्से बलपूबा न्हला। 11 परमेश्वरसे कुल्बा ताम आङ्यानबासे लमा ओन्माला महिगदे बलपूबा न्हबा ग्लारी वाङ्आम्याङ्नी। तर य्हाङ न्हङरी खालैनोन थेहङ् आतबाला लागिरी य्हाङ जम्मासेन थे बलपूबा न्हबा ग्लारी वाङ्बारी खमतेधोना भङ लङ।

12 परमेश्वरला छोन्बो बचन मी गे लसी चिबा शक्ति हिन्ना। चु न्हीलोनपट्टि धार मुबा तरवार भन्दा छ्यारबा मुला। चुसे महिला आत्मा, ल्हुइ, थेला जी जीदेन नखुला टाङ्गदेन फेला ओच्छे महिला सेमला तामदेन लबारी म्हाइबा गे ठीक मुला कि आरे भिसी च्याला। 13 परमेश्वरसे म्हाङ्आखम्बा ताम तिगैनोन आरे। थेला डाच्छा जम्मान ताम प्रस्टन मुला। य्हाङसे लबा जम्मान गेला हिसाब थेदान उन्तो:ला।

परमेश्वरला मन्दिररी पूजा लबा मुल महिगदे न्हङरी येशू जम्मान भन्दा घेन हिन्ना

* 4:7 भजन ९५:७-८ † 4:8 मोशा सिमाहेन्से इस्राएलीगदेदा यहोशूसे कनान भिबा यहलूसारी भोर्बा गे लजी।

14 थेतबासेलमा य्हाडसे लबा विश्वासरी अझ य्हाड कोड्सी चिइ। तिग्दा भिसम स्वर्गरी फेपबा परमेश्वरला झा येशून परमेश्वरला मन्दिररी पूजा लबा य्हाडला मुल म्हि हिन्ना। 15 परमेश्वरला मन्दिररी पूजा लबा मुल म्हिगदे न्हडला घेन म्हि य्हाडला येसूदा य्हाडला जम्मान कमजोरीगदे था मुला। तिग्दा भिसम थेदाएनोन य्हाडदा ह्ङ्ङनोन जम्मान तामरी फसब लबारी म्हाइजी। तर थेसे पाप चा आलनी। 16 थेतबासेलमा य्हाड आलोङ्ङना दया लबा परमेश्वरला ठिला डाच्छापट्टि निइ। दुख तबा धुइरी य्हाडसे थेरी थेला दयामायाग्याम हो याडला।

5

1 परमेश्वरला मन्दिररी पूजा लबा खजिबै मुल म्हि धम्मा म्हिगदे न्हडग्यामनोन धम्मुला। म्हिगदेला साटोरी परमेश्वरदा फुल्तोःबा पापला बलिदेन भेटी फुल्बाला लागिरी थेदा धम्बा हिन्ना। 2 थे मुल म्हिसे आसेबा आघोबादेन ग्याम थोर्सी भ्रबागदेदा आछेर्ना ज्यना लसी घोना लखम्मुला। तिग्दा भिसम थे ह्हाडएनोन कमजोर म्हि हिन्ना। 3 थेतबासेलमा स्य्हान्दो म्हिगदेला पापला लागिरी जे आहिन, तर थेसे ह्हाडला पापला लागिरीनोन बलि फुल्तोःमुला।

4 खालै म्हिसे ह्हाडला सेमसे म्हाइजी भिदेमा परमेश्वरला मन्दिररी पूजा लबा मुल म्हिसे याड्बा मान आयाड्। तर परमेश्वरसेन थे मान याड्बा म्हि सहोबारी धम्ला। थेह्ङ्ङ लसीन हारूनदाएनोन थेनोन परमेश्वरसे धम्जी।* 5 चुह्ङ्ङ लसी ख्रीष्टसेनोन ह्हाडनोन परमेश्वरला मन्दिररी पूजा लबा मुल म्हि दोबारी मान आम्हाइनी। तर थेदा
“ए डाला झा हिन्ना,
डा तिनी एला आबा दोबा मुला”

* 5:4 प्रस्था २८:१

भिसी सुड्बा परमेश्वरसेन धम्जी।* 6 ओच्छे परमेश्वरसे अर्गु
ग्लारीनोन चुहड् भिसी सुड्बा मुला,

“ए मल्कीसेदेक हड् नोन

सदनना लागिरी परमेश्वरदा तेन्बा म्हि हिन्ना”*

7 येशू जम्बुलिडरी म्हि दोसी धन्छ्यामा ल्हानान क्रासी हाड्दा
सिबाग्याम सोना लखम्बा परमेश्वरदेन छ्याम प्रार्थना लजी।
ओच्छे सोजो तसी कुल्बा ताम ड्यान्बासे लमा परमेश्वरसे
थेला प्रार्थना सान्जी। 8 येशू परमेश्वरला झा तसीनोन हाड्से
नाबा दुखग्याम परमेश्वरसे कुल्बा ताम ड्यान्बारी लोप्जी।
9 येशू जम्मान तामरी पाको तमाहेन्से थे हाड्से कुल्बा ताम
ड्यान्बा जम्मान म्हिगदेला लागिरी जुकजुकधोना थाबा पिन्बा
मुहान दोजी। 10 ओच्छे परमेश्वरसेन थेदा मल्कीसेदेकदा हड् नोन
परमेश्वरदा तेन्बा मुल म्हि दोबारी धम्जी।

विश्वास थाख्लागै भिसी होशियार तना लबा

11 चु तामला बारेरी एनीगदेदा डन्से पाड्तोःबा ताम ल्हानान
मुला। तर एनीगदेदा घोना लबारी गाहो तबा मुला। तिग्दा भिसम
एनीगदेसे योना आघोमुला। 12 तिनीधोना मी एनीगदे स्य्हान्दोदा
लोप्खम्बा म्हि ततोःमुबा। तर एनीगदेदा मी अझ परमेश्वरला
बारेरी जजाबा तामगदेएनोन स्य्हान्दो म्हिसे लोप्तोःबा मुला।
थेतबासेलमा एनीगदे चबा सहेला साटोरी अझ ड्हे थुड्बा कोलागदे
हड्बान मुला। 13 एनीगदे ड्हेला भररी जे सोबा कोलागदे हड्बा
म्हिसे चा ज्यबादेन नइबा तिग हिन्ना थे ताम था आत। 14 तर
चबा सहे चबा घेन म्हिसे चा धिन धिननोन हाड्से लबा गेग्याम
ज्यबादेन नइबा तिग हिन्ना थे ताम था याड्ला।

* 5:5 भजन २:७ * 5:6 भजन ११०:४

6

1 थेहड् भिसम य्हाड् स्त्रीष्टला बारैरी डाच्छा लोप्बा तामगदे जे आतना अझ घेन घेन तामगदे लोप्बान पाको म्हि दोगे। अथवा नाश तना लबा गेगदे ख्लासी परमेश्वरपट्टि दोःबा तामदेन परमेश्वरदा विश्वास लबा ताम य्हाड्दा घरिघरि लोप्आतोः। 2 ओच्छे बपतिसमाला बारैरी लोप्बा तामगदे, स्य्हान्दोथोरी या थान्सी प्रार्थना लबा तामगदे, सिबागदे दोःसी सोला भिबा तामगदेदेन जुकजुकधोनाला सजाय याड्ला भिबा तामगदेला बारैरीनोन एनीगदेदा दाहेन्से लोप्आतोः। 3 चुदे परमेश्वरसे सेम लजी भिसम य्हाड्से घेन घेन तामएनोन लला।

4 तिग विश्वास ख्लासी निबागदेदा दोःसी भसी परमेश्वरपट्टि दोःपुड्बारी खम्ला? आखम। तिग्दा भिसम जुन म्हिसे डाच्छा तिरेम परमेश्वरला य्हाल याड्सी स्वर्गला मोलमदेन परमेश्वरला आत्माएनोन याड्बा मुला। 5 थेनीगदेसे परमेश्वरला बचनएनोन था याड्बा मुला ओच्छे खबा धुइला बारैरी परमेश्वरसे लबा शक्तिशाली गेगदेएनोन म्राड्सी जिन्बा मुला। 6 थे जम्मान ताम था तसीनोन विश्वास लबा ख्लासी न्होड्सी निबा म्हिगदेदा दोःसी हाड हाडला पाप ख्लासी परमेश्वरपट्टि दोःपुड्बारी खमनोन आखम। तिग्दा भिसम थेहड्बा म्हिगदेसे परमेश्वरला झादा दोःसीनोन क्रुसरी टाँगब लसी जम्मान म्हिला ओन्छाडरी येशूला बेइज्जत लला।

7 ल्हानान हड् नाम ताइमाहेन्से बु भम्सी खेती लबागदेसे ढ्वबा अनन् ल्हानान रोला। थेहड्बा बु वारीसे परमेश्वरगयाम मोलम याड्ला।† 8 तर थे बुरी पुजु दोड्गदे जे फुइजी भिसम थे गे आखेल्बा तला। थेहड्बा बुदा परमेश्वरसे केःबारी छ्याइला। लिच्छा थे पुजु दोड्गदे मेरी खाड्ला।

† 6:7 चु पदला बारैरी उत्पत्ति ३:१७-१८ सहीगो

9 डाला सेम निबा ह्योगदे, डन्से चुहड्बा ताम लसैनोन एनीगदेला बारेरी चा ज्यबा ताम तला भिसी म्हन्बा मुला। ओच्छे थार्बा याड्सी एनीगदेसे ल्हानान ज्यबा स्हेगदे याड्ला। 10 परमेश्वरसे सदन ठीक निसाफ लमुला, ओच्छे एनीगदेसे परमेश्वरला म्हिगदेदा हो लसी परमेश्वरदा माया उन्बा मुला। अझ एनीगदेसे थेहड्बा गे लबान मुला, चु ताम परमेश्वरसे खाइमै आम्लेः। 11 एनीगदे जम्मासेन हाड हाडसे लबा आश पूरान याड्बाला लागिरी दुक्क तसी सोतेधोना भड लसी गे लला भिसी डन्से म्हन्बा मुला। 12 परमेश्वरसे पिन्ना भिसी कबुल लबा स्हेगदे याड्बाला लागिरी एनीगदे ब्लेगु थादोगै। ओच्छे विश्वास लसी जस्तोन दुख तसै नाबा म्हिगदे हड् तसी भ्रगै भिबा डन्ना सेम मुला।

परमेश्वरसे लबा कबुल

13 परमेश्वरसे य्हाडला म्हेमे अब्राहामदा मोलम पिन्ना भिसी कबुल लमा हाड भन्दा घेन स्य्हान्दो खालै आरेबासे लमा परमेश्वरसे हाडलान मिनरी घान फासी चुहड् भिसी सुड्जी, 14 “डाइ एदा मोलम पिन्नोन पिन्ना, ओच्छे एला सन्तान ल्हानान तला।”* 15 परमेश्वरसे पिन्ना भिसी कबुल लबा मोलम आयाड्तेधोना अब्राहामसे भ्रान्सी चिबासे लमा थे मोलम याड्जी।

16 खालै म्हिसे तिगै ताम पक्का लतोःजी भिसम थेसे हाड भन्दा घेन्ना मिनरी घान फामुला, ओच्छे आढिक्बा तामगदे घान फासी ढिक्ना लमुला। 17 परमेश्वरसे पिन्ना भिसी कबुल लबा मोलम याड्बा म्हिगदेदा हाडसे लबा कबुल खाइमै आपोमुला भिबा ताम उन्बा सेम लजी। थेतबासेलमा परमेश्वरसे घान फासी थे कबुल पक्का लजी। 18 परमेश्वरसे य्हाडदेन छ्याम कबुलएनोन लबा मुला, घानएनोन फाबा मुला। चु ताम न्ही चा खाइमै आपोमुला।

* 6:14 उत्प २२:१६-१७

ओच्छे परमेश्वरसे खाइमै लुसीला ताम आलमुला। थेतबासेलमा जोगब तबाला लागिरी परमेश्वरला डाच्छा निबा य्हाडसे घेन आँट याड्ला। ओच्छे य्हाडसे य्हाडला डाच्छापट्टि थान्सी पिन्बा आशएनोन याड्ला। 19 चु आश चा य्हाडला आत्मादा जोगब लबा पक्का सत्य ताम हिन्ना। चुनोन आशग्याम य्हाड परमेश्वर धन्छ्याबा ग्लाधोना धोला। 20 य्हाडला लागिरी येशू य्हाड भन्दा डाच्छान थे ग्लारी फेप्सी धन्छ्यासी जिन्बा मुला। ओच्छे येशू सदनना लागिरी परमेश्वरदा तेन्बा म्हि मल्कीसेदेक हड्बान मुल म्हि दोबा मुला।

7

परमेश्वरदा तेन्बा मल्कीसेदेक

1 चु मल्कीसेदेक शालेम भिबा यहुल्साला ग्लेदेन जम्मान भन्दा घेन परमेश्वरदा तेन्बा म्हि मुबा। अब्राहाम गोर बलि ग्लेदेन लडाइ लसी ढासी दोःसी खबा धुइरी मल्कीसेदेकसे स्याप्सी मोलम पिन्जी। 2 अब्राहामसे ग्लेगदेदा ढासी भबा जम्मान सहेगदेग्याम भो च्युइला भो गिक फेसी मल्कीसेदेकदा पिन्जी। मल्कीसेदेक भिबाला अर्थ गिक चा ठीक निसाफ लबा ग्ले हिन्ना। ओच्छे थे शालेम यहुल्साला ग्ले तबासे लमा मल्कीसेदेक भिबाला अर्गु अर्थ चा शान्तिला ग्ले हिन्ना। 3 मल्कीसेदेकला आबा आमादेन आखे म्हेमे खाल हिन्ना भिसी तिगै भ्रिसी थान्बा आरे। ओच्छे थे न्हबादेन सिबा तामला बारेरीनोन तिगै भ्रिसी थान्बा आरे। परमेश्वरला झा हड्बान थेएनोन सदनना लागिरी परमेश्वरदा तेन्बा म्हि दोजी।

4 मल्कीसेदेक गाते घेन म्हि मुबा भिबा ताम एनीगदेदा था तला। य्हाडला म्हेमे अब्राहामसेनोन लडाइरी ढासी भबा जम्मान सहेग्याम भो च्युइला भो गिक थेदा पिन्जी। 5 परमेश्वरला

मन्दिररी पूजा लबा लेवी वंशला म्हिगदेएनोन अब्राहामलान सन्तान तसैनोन परमेश्वरसे मोशादा पिन्बा ठिम अन्छार हाडलान म्हिगदेग्याम भो च्युइला भो गिक किन्मुबा। ⁶ परमेश्वरदा तेन्बा मल्कीसेदेक लेवी वंशला आहिन। तसैनोन थेसे परमेश्वरला मन्दिररी पूजा लबा म्हिगदेला म्हेमे अब्राहामग्याम भो च्युइला भो गिक किन्जी। ओच्छे परमेश्वरसे लबा कबुलगदे याडतोःबा अब्राहामदा थेसे मोलम पिन्जी। ⁷ घेन म्हिसे जजा म्हिदा मोलम पिन्ना भिबा ताम जम्मादान था मुला। ⁸ परमेश्वरला मन्दिररी पूजा लबा सिसी निबा म्हिगदेसे भो च्युइला भो गिक किन्जी। तर परमेश्वरदा तेन्बा खाइमैनोन आसिबा मल्कीसेदेकसेनोन भो च्युइला भो गिक किन्बा मुबा। ⁹ लेवीगदेसे म्हिगदेग्याम भो च्युइला भो गिक किन्मुबा। तर चुहङ्गेनोन पाङ्खम्ला, लेवीगदेला म्हेमे अब्राहामसे मल्कीसेदेकदा भो च्युइला भो गिक पिन्माहेन्से लेवीगदेसेनोन पिन्बा तला। ¹⁰ तिग्दा भिसम मल्कीसेदेकसे अब्राहामदा स्यापमा लेवी हाडला म्हेमे अब्राहामला ल्हुइरीन मुबा।

येशू मल्कीसेदेक हङ्बान हिन्ना

¹¹ लेवी वंशला म्हिगदेसे परमेश्वरला मन्दिररी पूजा लबा गे याङ्बा मुबा। थेतबासेलमा इस्राएलीगदेसे परमेश्वरग्याम ठिम याङ्जी। तर परमेश्वरला मन्दिररी पूजा लबा लेवीला गे लबा ठिम अन्छार खालै म्हिदा तिगै दोष आरेबा म्हि स्होबारी खम्बा हिन्सम हारूनना सन्तानना† साटोरी मल्कीसेदेक हङ्बा परमेश्वरदा तेन्बा स्य्हान्दो म्हि तिग्दा खतोःजी? ¹² तिग्दा भिसम परमेश्वरला मन्दिररी पूजा लबा मुल म्हि स्य्हान्दोन खाल्ला पोमाहेन्से ठिमएनोन पोतोःला।

† 7:11 हारूनना सन्तान चा लेवीगदे हिन्ना।

13 य्हाडला प्रभुला बारेरी चु तामगदे पाड्बा मुला, थे अर्गु वंशला हिन्ना। थेला वंशला खालैसेन परमेश्वरदा भेटी फुल्बा ग्लारी गे लबा आरे। 14 य्हाडला प्रभु मी यहूदाला वंशरी न्हबा हिन्ना। यहूदाला वंशग्याम परमेश्वरला मन्दिररी पूजा लबा म्हि स्होबा तामला बारेरी मोशासे तिगैनोन पाड्बा आरे भिबा ताम जम्मादान था मुला।

15 मल्कीसेदेक हड्बान परमेश्वरदा तेन्बा स्य्हान्दो म्हि खसी जिन्बासे लमा दाहेन्से चु जम्मान ताम इन ज्यना लसी घोला। 16 थे य्हाडला आखे म्हेमेला ठिम अन्छार स्होबा परमेश्वरदा तेन्बा म्हि आहिन। तर खाइमै नाश आतबा जुनीला शक्तिग्याम स्होबा परमेश्वरदा तेन्बा म्हि हिन्ना। 17 तिग्दा भिसम थेला बारेरी बचनरी चुहड् भिसी भिबा मुला, “मल्कीसेदेक हड्बान ए सदनना लागिरी परमेश्वरदा तेन्बा म्हि हिन्ना।”* 18 तिग्दा भिसम थे डाच्छाला ठिम चा तिगै लआखम्बादेन गे आखेल्बा तबासे लमा भ्याड्बा मुला। 19 तिग्दा भिसम थे ठिमसे खजिबै सहेदा तिगै दोष आरेबा स्होआखम्नी। तर दाहेन्से इन य्हाडदा ज्यबा आश पिन्बा मुला। थे आशग्याम य्हाड परमेश्वरला डामरी धोखम्ला।

20 परमेश्वरसे ह्याडला ताम पक्का लबाला लागिरी घान फासी चु छार ठिम शुरु लबा हिन्ना। चुहड्बा घान चसी परमेश्वरसे पूजा लबा स्य्हान्दो खजिबै म्हिगदेदा धम्बा आरे, 21 तर येशू चा परमेश्वरसे घान फासी परमेश्वरला मन्दिररी पूजा लबा म्हि स्होबा हिन्ना। थेला बारेरी बचनरी चुहड् भिसी भिबा मुला, “परमप्रभुसे घान फासी जिन्बा मुला,

थेसे ह्याडला सेम खाइमै आपो।

‘ए सदनना लागिरी परमेश्वरला मन्दिररी पूजा लबा म्हि हिन्ना।’ ” 22 परमेश्वरसे लबा ज्यबा कबुलला जिम्मा येशूसे किन्बा मुला।

* 7:17 भजन ११०:४

23 ओच्छे अर्गु ताम चा डाच्छा परमेश्वरला मन्दिररी पूजा लबा म्हिगदे ल्हानान मुबा। तिग्दा भिसम थेनीगदे सिसी निबासे लमा सदन हाडला गे लबारी आखम्मुबा। 24 तर येशू चा जुकजुकधोनान सोसी चिबासे लमा थे सदनना लागिरी परमेश्वरला मन्दिररी पूजा लबा म्हि दोबा मुला। 25 थेतबासेलमा येशूदा विश्वास लसी परमेश्वर मुबा ग्लारी खबा म्हिगदेदा थेसे सदनना लागिरी थार्ना लबारी खम्मुला। तिग्दा भिसम थेनीगदेला लागिरी परमेश्वरदेन छ्याम प्रार्थना लसी पिन्बारी येशू सदन सोसी चिला।

26 य्हाडदा तोःबा परमेश्वरदा तेन्बा मुल म्हि चुनोन येशू हिन्ना। थे पापनोन आलबादेन चोखो ओच्छे तिगै दोष आरेबा मुला। थेतबासेलमा परमेश्वरसे थेदा पापी म्हिगदेग्याम फेसी स्वर्गला जम्मान भन्दा मुल ठिरी धन्छ्यापुड्बा मुला। 27 परमेश्वरला मन्दिररी पूजा लबा अर्गु मुल म्हिगदेसे म्हिगदेला पाप माफ लबारी धिन धिननोन बलि फुलतोःमुबा। तर येशूसे चा थेहड् लसी बलि फुलआतोःनी। तिग्दा भिसम थे हाडनोन तिरेमरीन सदनना लागिरी बलि तसी जिन्बा मुला। 28 तिग्दा भिसम मोशादा पिन्बा ठिम अन्छार कमजोर म्हिगदेदा परमेश्वरला मन्दिररी पूजा लबा मुल म्हि सहोबारी धम्जी। तर परमेश्वरला झा येशूदा थे ठिम भन्दा लिच्छा परमेश्वरसे हाडसे घान फाबा अन्छार धम्बा मुला। ओच्छे सदनना लागिरी तिगै दोष आरेबा सहोबा मुला।

8

येशू परमेश्वरदा तेन्बा य्हाडला मुल म्हि हिन्ना

1 डन्से पाड्बा मुल तामएनोन चुनोन हिन्ना, य्हाडला जम्मान भन्दा घेन परमेश्वरदा तेन्बा मुल म्हि स्वर्गरी परमेश्वरला दाहिनेपट्टि ठिरी धन्छ्याबा मुला।* 2 येशू परमेश्वरदा तेन्बा मुल

* 8:1 भजन ११०:१

म्हि दोसी स्वर्गला जम्मान भन्दा चोखो ग्लारी गे लमुला। चु चोखो ग्ला म्हिसे सहोबा आहिन, तर परमेश्वरसे सहोबा सत्य पाल हिन्ना।

3 परमेश्वरला मन्दिररी पूजा लबा जम्मान मुल म्हिगदे परमेश्वरदा भेटीदेन बलि फुल्बाला लागिरी धम्बा हिन्ना। थेतबासेलमा परमेश्वरदा तेन्बा य्हाडला मुल येशूसेनोन परमेश्वरदा तिगै सहे फुल्नोन तोःला। 4 येशू चु जम्बुलिडरी मुबा हिन्सम खाइमै परमेश्वरदा तेन्बा म्हि आदोसेला मुबा। तिग्दा भिसम मोशादा पिन्बा ठिम अन्छार भेटी फुल्बा परमेश्वरला मन्दिररी पूजा लबा लेवी वंशला म्हिगदे मी चुरी डाच्छाहेन्सेन मुबा। 5 थेनीगदेसे परमेश्वरला मन्दिररी पूजा लबा गे चा स्वर्गरी मुबा सत्य ताम हड्बा जे हिन्ना, तर स्वर्गरी मुबा सत्य तामनोन चा आहिन। मोशादाएनोन परमेश्वरसे थेहड्बान लउ भिसी कुल्बा मुबा। मोशासे परमेश्वरदा तेन्बारी पाल सहोबारी छ्याइमा, “च्यागो, जम्मान ताम डाइ एदा गडरी उन्बा हड्बान सहोउ” भिसी कुल्बा मुबा।* 6 तर येशूसे परमेश्वरदा तेन्बा गे चा परमेश्वरला मन्दिररी पूजा लबा स्यहान्दो मुल म्हिगदेला गे भन्दा इन घेन मुला। थेहड् लसीन परमेश्वरदेन परमेश्वरला म्हिगदेला गुडरी येशूसे लबा छार कबुल थे पुरानो कबुल भन्दा ज्यबा मुला। तिग्दा भिसम छार कबुलरी ल्हानान ज्यबा तामगदे मुला।

7 पुरानो कबुलरी तिगै दोष आरेबा हिन्सम थेला ग्लारी दोःसी अर्गु कबुल लनोन आतोःसेला मुबा। 8 तर परमेश्वरसे हाडला म्हिगदेसे लबा गल्ती था याड्सी चुहड् भिसी सुड्जी, “परमप्रभुसे चुहड् भिसी सुड्बा मुला, डाइ इस्राएलला सन्तानदेन यहूदाला सन्तानदेन छ्याम

* 8:5 प्रस्था २५:४०

छार कबुल लबा धिन खबान मुला।*

9 थे छार कबुल डाइ थेनीगदेला आखे म्हेमेगदेदेन छ्याम लबा कबुल हड्बा आत।

थे धुइरी डाइ थेनीगदेदा यारी चुड्सी मिश्र य्हुल्साग्याम फेसी भबा मुबा।

परमप्रभुसे चुहड् भिसी सुड्बा मुला,

थेनीगदे डाइ लबा कबुल अन्छार आभ्रनी।

थेतबासेलमा डाइ थेनीगदेला वास्ता आलनी।

10 थे धिन खमाहेन्से डाइ इस्राएलला सन्तानगदेदेन छ्याम छार कबुल लला,

डाइ थे ठिम थेनीगदेला सेमरी भिसी थान्ना।

डा थेनीगदेला परमेश्वर दोला ओच्छे थेनीगदे डाला म्हि दोला।

11 “परमप्रभुदा डोसेगो” भिसी दाहेन्से खालैसेन हाडला खिमजेमदा, हाडला ज्योज्यो आले नाना आडादा लोप्आतोः।

तिग्दा भिसम जजाहेन्से घेनधोनाला जम्मासेन डादा डोसेला।

12 डाइ थेनीगदेसे लबा नड्बा गेला दोष मेटब लला,

ओच्छे थेनीगदेसे लबा पाप डाइ दोःसी खाइमै आढन।”*

13 चु कबुलदा “छार” भिसी सुड्बासे लमान परमेश्वरसे डाच्छाला कबुलदा भोक्टो सहोजी। थे डाच्छाला कबुल चा भोक्टो तबासे लमा म्हासी निला।

9

परमेश्वरदा तेन्बाला लागिरी म्हिसे सहोबा चोखो ग्ला

1 पुरानो कबुलरी परमेश्वरदा तेन्बा ठिम मुबा। ओच्छे थे ठिमरी परमेश्वरदा तेन्बा चोखो ग्लाला बारेरीनोन भिबा मुबा। 2 थे पाल न्हडरी कोठा न्ही मुबा। डाच्छापट्टिला कोठादा चोखो ग्ला भिसी

* 8:8 यर्मि ३१:३१-३४ * 8:12 यर्मि ३१:३१-३४

भिमुबा। थे कोठारी चा नाडसल थान्बा ग्लादेन टेबुल मुबा। थे टेबुलथोरी चा परमेश्वरदा फुल्बा गेडगदे मुबा।³ थे कोठा भन्दा न्हडरी अर्गु पर्दा गिक मुबा। थे पर्दा न्हडला कोठादा चा जम्मान भन्दा चोखो ग्ला भिसी भिमुबा।*⁴ थे कोठा न्हडरी म्हरला धूप म्राबा ग्लादेन डाच्छाला कबुल थान्बा म्हरसे मोरब लबा चोखो सन्दोस मुबा। थे सन्दोस न्हडरी म्हरला ताडरी मनन्देन म्हेन्दो सार्बा हारूनना कडी ओच्छे परमेश्वरसे हाडला म्हिगदेदेन छ्याम लबा कबुल भिसी थान्बा युडबाला पाटीगदे मुबा।*⁵ परमेश्वरला य्हालदेन शक्ति थेरी मुला भिसी उन्बाला लागिरी थे सन्दोसथोरी पाप माफ लबा ग्लारी भ्याप मुबा करूब भिबा स्वर्गदूत न्ही मुबा। थे ग्लादा थेन्नीला भ्याप्से घप्सी थान्बा मुबा। तर दान्देन डन्से चु ताम मेलोसेन पाड्बारी आखम।*

⁶ चु जम्मान सहेगदे ठीक लसी जिन्माहेन्से परमेश्वरला मन्दिररी पूजा लबा म्हिगदे हाडसे लतोःबा गेगदे लबारी धिन धिननोन डाच्छापट्टिला चोखो ग्लारी निमुबा।*⁷ तर जम्मान भन्दा चोखो ग्लारी चा तिदिडरी तिरेम परमेश्वरला मन्दिररी पूजा लबा मुल म्हि गिक बाहेक स्य्हान्दो खालै आनिमुबा। थेणोन थेरी जन्तुला का आभोर्दे निआखममुबा। थे का थेसे हाडला पापदेन स्य्हान्दो म्हिगदेला पापला लागिरी फुल्मुबा।*⁸ चु जम्मान तामगदेग्याम डाच्छापट्टिला चोखो ग्ला मुतेधोना मन्दिर न्हडपट्टिला जम्मान भन्दा चोखो ग्लारी वाड्बा म्राप आठोड् भिबा ताम परमेश्वरला आत्मासे उन्बा मुला।⁹ चु ताम चा दान्देला धुइ गाते घेन मुला भिसी उन्बा चिनु जे हिन्ना। चु तामग्याम परमेश्वरदा फुल्बा भेटीदेन बलिसे महिला सेम चोखो सहोबारी आखम भिसी उन्बा मुला।¹⁰ थे सहेगदे चा चबा थुड्बादेन

* 9:3 प्रस्था २६:३१-३३

* 9:4 प्रस्था ३०:१-६; २५:१०-१६; १६:३३; गन्ती

१७:८-१०; व्यव १०:३-५

* 9:5 प्रस्था २५:१८-२२

* 9:6 गन्ती १८:२-६

* 9:7 लेवी १६:२-३४

म्हिदा चोख्याब लबा ल्हानान थरीला ठिम जे हिन्ना। थे ठिम चा परमेश्वरग्याम छार ठिम आखतेधोनाला लागिरी ल्हुइ चोखो तना लबा ठिम जे हिन्ना, सेम चोखो तना लबा ठिम आहिन।

ख्रीष्टला का

¹¹ तर ख्रीष्ट चा परमेश्वरदा तेन्बा मुल म्हि दोसी दान्दे चुरी मुबा जम्मान ज्यबा स्हेगदे पिन्बाला लागिरी फेप्खबा मुला। थे जम्मान भन्दा घेनदेन चोखो ग्लारी फेपजी। चु ग्ला चा जम्बुलिडला स्हेगदेग्याम म्हिसे स्होबा ग्ला आहिन। ¹² ख्रीष्टसे बोगोदेन बहरला का भोर्सी आहिन, तर हाडलान का भोर्सी तिरेमरीन य्हाडदा जुकजुकधोनान पापग्याम फेबाला लागिरी थे जम्मान भन्दा चोखो ग्लारी फेपजी। ¹³ डाच्छाला ठिम अन्छार रा बोगोदेन बहरला का ओच्छे म्हे योमो खाड्बा मेफ्रा अशुद्ध तबा म्हिगदेदा स्वामा थेनीगदेला ल्हुइ चोखो तमुबा। ¹⁴ इन ख्रीष्टला काग्याम य्हाड सोसी छोन्बो परमेश्वरदा तेन्गै भिसी य्हाडदा सिना लबा गे लपुड्बा नइबा सेमदा चोखो स्होबा मुला। तिग्दा भिसम ख्रीष्ट खाड्मै नाश आतबा आत्माग्याम तिगै दोष आरेबा बलि दोसी हाडसे हाडदान परमेश्वरदा फुल्जी।

¹⁵ थेतबासेलमा परमेश्वरसे जुकजुकधोना चिबा मोलमगदे पिन्ना भिसी लबा कबुल हाडसे धम्बा म्हिगदेसे याड्गै भिसी छार कबुल ढिकना लबा चा ख्रीष्टनोन हिन्ना। तिग्दा भिसम डाच्छा लबा पुरानो कबुलला धुइरी म्हिगदेसे लबा पापगदेग्याम फेबाला लागिरीन ख्रीष्ट सिबा मुला।

¹⁶ अर्गु ताम चा खालै म्हिसे हाडला सम्पत्ति बकसपत्र भिसी पिन्बा हड्बा हिन्ना, तिग्दा भिसम बकसपत्र लसी पिन्बा म्हि आसितेधोना थे बकसपत्रसे तिगै गे आल। ¹⁷ तिग्दा भिसम बकसपत्र भिसी पिन्बा म्हि सोतेधोना बकसपत्र याड्बा म्हिला तिगै अधिकार आत। थे बकसपत्र भिसी पिन्बा म्हि सिमाहेन्से

जे बकसपत्र याड्बा म्हिला अधिकार तला। 18 थेतबासेलमा डाच्छा लबा पुरानो कबुलसेनोन का आरेतेधोना तित्गै गे आलमुबा। 19 मोशासे परमेश्वरसे पिन्बा जम्मान ठिमगदे म्हिगदेदा पाड्सी जिन्माहेन्से क्युडरी बोगोदेन बहरला का दोड्सी हिसपला स्याउलादेन वाला ऊनसे म्हिगदेदेन परमेश्वरसे पिन्बा ठिमला किताबरी स्वामुबा।* 20 ओच्छे थेसे चुहड् भिसी भिजी, “एनीगदेसे परमेश्वरसे कुल्बा ताम ड्यानगै भिसी थेसे एनीगदेदेन छ्याम लबा कबुलदा पक्का लबा चा चुनोन का हिन्ना।” 21 थेहड् लसीन मोशासे परमेश्वरला मन्दिरला चोखो ग्लादेन पूजा लबारी चलब लबा जम्मान सहेगदेरी थे का स्वाजी।* 22 पाड्नुन तोःमा परमेश्वरसे मोशादा पिन्बा ठिम अन्छार जम्मान हड्बा सहेदा कासे चोखो तना लला, का बगब आततेधोना पापला दोष मेटब आत।

23 थे डाच्छाला ठिमला तामगदे स्वर्गरी मुबा सहेगदे हड्बा जे हिन्ना। थेहड्बा सहेगदेदा मी चोखो सहोबारी ठिम तोःजी भिसम स्वर्गरी मुबा सहेगदेदा चोखो सहोबारी झन ज्यबा बलि लतोःला। 24 थेतबासेलमा ख्रीष्ट म्हिसे सहोबा चोखो ग्लारी आफेपनी। तित्गदा भिसम थे स्वर्गरी मुबा चोखो सत्य ग्ला हड्बा जे हिन्ना। तर दान्दे थे परमेश्वरला डाच्छा यहाडला लागिरी ताम थान्बारी स्वर्गरी फेपुबा मुला। 25 डाच्छाला ठिम अन्छार परमेश्वरला मन्दिररी पूजा लबा मुल म्हि जनतुला का भोर्सी दिड्एदडसेन चोखो ग्लारी नितोःबा मुबा। तर ख्रीष्ट चा हाडनुन बलि दोसी घरिघरि स्वर्गरी आफेपनी। 26 चुदे सदन फेपुतोःबा हिन्सम जम्बुलिड छ्यामाहेन्सेन ख्रीष्टसे घरिघरि दुख नातोःसेला मुबा। तर जम्बुलिड नाश तबा धुइधोनाला लागिरी ख्रीष्ट तिरेम फेपुखसी सदनना लागिरी पापला दोष मेटब लबारी हाडनुन बलि

* 9:19 प्रसथा २४:६-८; लेवी १४:४ * 9:21 लेवी ८:१५

तजी। ²⁷ म्हि तिरेम सिनोन तोःला, ओच्छे सिमाहेन्से परमेश्वरसे थेला निसाफ लला। ²⁸ थेह्इ लसीन ल्हानान म्हिला पापला दोष मेटब लबाला लागिरी ख्रीष्टएनोन तिरेम जे बलि दोजी। ख्रीष्ट दोःसीनोन फेपखला, ओच्छे थे धुइरी चा म्हिगदेला पापला दोष मेटब लबाला लागिरी आहिन, तर ताड्सी ताड्सी थेला ग्याम च्यासी चिबागदेदा थार्ना लबारी फेपखला।

10

ख्रीष्ट सदनना लागिरी बलि तजी

¹ परमेश्वरसे मोशादा पिन्बा ठिम चा लिच्छा खबा ज्यबा तामला चिनु जे हिनना। तर ख्रीष्टसे लबा ज्यबा तामनोन चा आहिन। तिग्दा भिसम डाच्छाला ठिम अन्छार दिडएदडसेन खाल गिकलान बलि फुल्मुबा। तर थे बलिसे चा परमेश्वर मुबा ग्लारी खबा म्हिगदेदा चोखो सहोबारी आखम। ² बलि फुल्सी म्हिगदे चोखो तबा हिनसम बलि फुल्बान आख्लासेला मुबा। तिग्दा भिसम परमेश्वरदा तेन्बा म्हिगदे सदनना लागिरी चोखो तसेला मुबा। ओच्छे थेनीगदेसे पापी भिसी म्हन्आतोःसेला मुबा। ³ बरु थे दिडएदडसेन लबा बलिसे म्हिगदेदा हाडला पाप सदन ढन्ना जे लला। ⁴ तिग्दा भिसम बहरदेन रा बोगोगदेला कासे खाइमै पापला दोष मेटब लबारी आखम।

⁵ थेतबासेलमा जम्बुलिडरी फेपखबा धुइरी ख्रीष्टसे परमेश्वरदा चुहड् भिसी सुड्जी,
“हाडसे भेटीदेन बलिदान आम्हाइनी,

तर डाला लागिरी हाडसे ल्हुइ गिक सहोजी।

⁶ हाड मेरी खाड्सी फुल्बा बलिदेन पापला दोष मेटब तबाला लागिरी फुल्बा बलिगदेरीनोन आताड्नी।’

⁷ जमाहेन्से डाइ चुहड् भिसी भिजी,

‘सहीगो परमेश्वर, डाला बारैरी बचनरी भिबा हड्जोन

हाडसे म्हन्बा अन्छार पूरा लबारी डा खबा मुला।” *⁸

⁸ ख्रीष्टसे डाच्छा चुहड् भिसी सुड्जी, “जन्तुगदेला बलिदेन अन्न बलिगदे ओच्छे बलि फुल्बा ग्लारी खाड्सी पिन्बा जन्तुला बलिदेन पाप मेटब तबाला लागिरी फुल्बा बलि किन्बारी हाड आताड्नी।” चु जम्मान बलिगदे चा मोशादा पिन्बा ठिम अन्छार मुसैनोन चुहड् भिसी सुड्जी। ⁹ ओच्छे दोःसी ख्रीष्टसे चुहड् भिसी सुड्जी, “सहीगो, हाडसे म्हन्बा ताम पूरा लबाला लागिरी डा खबा मुला।” लिच्छाला ठिमदा सदनना लागिरी थान्बारी ख्रीष्टसे डाच्छाला ठिमदा भ्याड्जी। ¹⁰ परमेश्वरसे म्हन्बा ताम पूरा लबारी येशू ख्रीष्टसे हाडलान लहुड बलि फुल्जी। चुनोन बलिग्याम यहाडदा सदनना लागिरी चोखो सहोबा मुला।

¹¹ परमेश्वरला मन्दिररी पूजा लबा जम्मान म्हिगदेसे डाच्छाला ठिम अन्छार सदन परमेश्वरला डाच्छा निसी घरिघरि खाल गिकलान बलि फुल्बा गे लमुला। तर थेहड्बा बलिसे खाड्मै पापला दोष मेटब आतमुला।* ¹² तर ख्रीष्टसे मी पापगदेला दोष सदनना लागिरी मेटब लबारी हाडलान लहुडदा बलि गिक सहोसी फुल्जी। ओच्छे थे परमेश्वरला दाहिने छ्यापट्टि मुल ठिरी धन्छ्याजी।* ¹³ परमेश्वरसे थेला शत्रुगदेदा थेला काड धिरी आथान्तेधोना थे थेरीन भ्रान्सी धन्छ्याला। ¹⁴ तिग्दा भिसम बलि गिकग्यामसेन थेसे चोखो सहोबा म्हिगदेदा सदनना लागिरी थेसे तिगै दोष आरेबा सहोबा मुला।

¹⁵ ओच्छे परमेश्वरला आत्मासेनोन चुला बारेरी यहाडदा चुहड् लसी उन्बा मुला,

¹⁶ “परमप्रभुसे चुहड् भिसी सुड्बा मुला,
लिच्छाला धिनरी थेनीगदेदेन छ्याम लबा छार कबुल चुनोन
हिन्ना।

* 10:7 भजन ४०:६-८ * 10:11 प्रस्था २९:३८ * 10:12 भजन ११०:१

डाइ थेनीगदेला सेमरी डाला ठिम भिसी थान्ना।”*

17 दोःसी परमप्रभुसे चुहड् भिसी सुड्बा मुला,

“दाहेन्से डाइ थेनीगदेसे लबा पापदेन आज्यबा गेगदे खाइमै आढन।”*

18 दाहेन्से थेनीगदेला जम्मान पाप माफ तबासे लमा दोःसी थेनीगदेला पापला लागिरी तिगै बलि फुल्आतोः।

परमेश्वरला डाच्छापट्टि निउ

19 थेतबासेलमा ज्योज्यो आले नाना आडागदे, येशूला कासे लमा य्हाडसे जम्मान भन्दा चोखो ग्लारी निबा आँट याड्बा मुला।

20 येशूसे ह्हाडला ल्हुइ य्हाडला लागिरी बलि पिन्जी। ओच्छे पर्दाग्याम जम्मान भन्दा चोखो ग्लारी निबारी जुकजुकधोना सोबा छार ग्याम ठोड्सी पिन्बा मुला।

21 परमेश्वरला दिमरी जम्मान अधिकार याड्बा परमेश्वरदा तेन्बा य्हाडला मुल म्हि गिक मुला।

22 दाहेन्से य्हाड आज्यबा म्हन्बा तामग्याम चोखो तबादेन चोखो क्युइसे खुसी थाबा ल्हुइ थोसी ज्यबा सेमदेन पूरा विश्वास लसी परमेश्वरला डामरी निइ।*

23 य्हाडसे लबा आशरी य्हाड याडयोड आतना कोड्सी चिइ। तिग्दा भिसम ह्हाडसे पिन्ना भिसी कबुल लबा परमेश्वर चा विश्वास लखम्बा परमेश्वर हिन्ना।

24 य्हाडसे गिकसेम गिकदा माया लबादेन ज्यबा गे लबाला लागिरी आँट खबा खाल्ला ताम जे लइ।

25 कोइ कोइ महिला संगतीरी आनिबा बानी मुला। तर य्हाड चा संगतीरी निबा आख्लागे। बरु प्रभु दोःसी फेपखबा धिन खबारी छ्याइबा मुला भिबा ताम घोसी गिकसेम गिकदा झन आँट पिन्गे।

26 तिग्दा भिसम सत्य ताम था याड्सीनोन चुदे दोःसी पाप लबाला लबान लजी भिसम य्हाडसे लबा पापला दोष मेटब लबारी

* 10:16 यर्मि ३१:३३ * 10:17 यर्मि ३१:३४ * 10:22 लेवी ८:३०; इज ३६:२५

अर्गु खजिबै बलिदान आरे। 27 तर थेह्ङ्बा पाप लबागदे चा परमेश्वरला शत्रुगदेदा नाश लबा ल्हानान घेन मेदेन परमेश्वरसे पिन्बा लोङ्बा खबा सजाय भ्रान्सी चितोःबा जे मुला।* 28 चुदे खालै म्हिसे परमेश्वरसे मोशादा पिन्बा ठिम आङ्ग्यान्ना भ्रबा ताम म्हि न्ही सोमसे म्राङ्गी पाङ्गी भिसम थे ठिम आङ्ग्यान्बा म्हिदा तिगै दया आउन्ना साइतोःबा मुबा।* 29 थेह्ङ् भिसम परमेश्वरला झादा बिरोध लबा म्हिसे झन गाते ल्हाना सजाय याङ्गला। तिगदा भिसम थेसे हाडदा पापग्याम फेसी चोखो तना लबादेन परमेश्वरसे लबा कबुलदा पूरा लबा ख्रीष्टला कादा गे आखेलबा सहे स्होबा मुला, ओच्छे दयामाया पिन्बा परमेश्वरला आत्मादा बिरोध लबा मुला।* 30 तर चुह्ङ् भिसी सुङ्बा परमेश्वरदा यहाडसे डोसेबा मुला, “बदला किन्बा गे डाला हिन्ना, डाइ थेनीगदेसे लबा गे अन्छारला सजाय पिन्ना”। ओच्छे दोःसी, “परमप्रभुसे हाडला म्हिगदेला ठीक निसाफ लला” भिसीएनोन सुङ्बा मुबा।* 31 पाप गे लबागदे छोन्बा परमेश्वरला छ्यारी परब तबा चा लोङ्बा खबा ताम हिन्ना।

32 एनीगदेसे येशू ख्रीष्टला बारेरी लोपबा डाच्छाला धिनगदेदा थाम्लेःगो। जमा धुइरी एनीगदेसे ल्हानान दुख नातोःसै विश्वासरी कोङ्गी चिबा मुबा। 33 खाइमाम एनीगदेसे जम्मान महिला ओन्छाडरी दुखदेन हेला नाजी। ओच्छे खाइमाम एनीगदेसे दुखरी परब तबागदेदा ह्यो लजी। 34 एनीगदेसे झ्याल्खानरी परब तबागदेदा ह्यो लजी। ओच्छे हाडदेन छ्याम मुबा जम्मान धन सम्पत्ति ब्यन्माएनोन एनीगदेसे ताङ्गी ताङ्गी नाजी। तिगदा भिसम जुकजुकधोना चिबा अझ घेन सम्पत्ति हाडदेन छ्याम मुला भिबा ताम एनीगदेदा था मुबा।

* 10:27 यशै २६:११ * 10:28 वयव १७:६; १९:१५ * 10:29 प्रस्था २४:८

* 10:30 वयव ३२:३५-३६

35 थेतबासेलमा एनीगदेसे विश्वासग्याम जुन आँट याड्बा मुला थे थाख्लागो। चुग्यामसेन एनीगदेसे घेन इनाम याड्बा।

36 परमेश्वरदा सेम निबा गे लबारीदेन परमेश्वरसे पिन्ना भिसी कबुल लबा तामगदे याड्बाला लागिरी भ्रान्सी चितोःबा मुला।

37 तिग्दा भिसम बचनरी चुहड् भिसी भ्रिबा मुला,

“दाहेनुसे फेप्खबा चा फेप्खनोन खला,

थेसे घडना आल।*

38 तर डाइ म्हन्बा अन्छार भ्रबा डाला म्हिगदे चा विश्वासग्याम सौला,

ओच्छे चुदे थेनीगदे न्हडला खालैसे विश्वास लबा ख्लाजी भिसम थे म्राड्सी डा आताड्।”

39 यहाड चा विश्वास लबा ख्लासी नाश तबा म्हिगदे न्हडला आहिन, तर विश्वास लसी थार्बा याड्बा म्हिगदे न्हडला हिन्ना।

11

विश्वास

1 विश्वास लबा चा आश लबा ताम याड्ला भिसी हुक्क तबादेन आम्राड्बा तामरी पूरान भर लबा हिन्ना। 2 तिग्दा भिसम थेनीगदेसे विश्वास लबासे लमान ओन्माला म्हिगदेदा परमेश्वरसे हाडला म्हि सहोजी।

3 परमेश्वरसे हाडला बचनग्यामसे चु जम्बुलिड सहोजी भिबा ताम विश्वासग्याम यहाडसे था याड्बा मुला। थेहड् लसी यहाडला मीसे आम्राड्बा स्हेगदेग्यामसेन म्राड्बा स्हेगदे सहोजी।*

4 विश्वासग्यामसेन हाबिलसे परमेश्वरदा कयिनसे भन्दा ज्यबा बलि फुल्जी। विश्वासग्यामसेन हाबिलदा परमेश्वरसे

* 10:37 हब २:३-४ * 11:3 उत्प १:१; भजन ३३:६, ९; यूह १:३

हाडदा सेम निबा म्हि सहोजी। ओच्छे थेसे फुल्बा बलि परमेश्वरदा सेम निजी। थे सिसी निसैनोन थला विश्वासग्याम थेसे अझ य्हाडदा ल्हानान ताम लोपबान मुला।*

5 विश्वास लबासे लमान हनोक आसिनी। तर थेदा छोन्बोन स्वर्गरी भोर्जी। ओच्छे थेदा खालैसेन आस्यापनी। तिगदा भिसम परमेश्वरसे थेदा थीसी भोर्बा मुबा। थेदा परमेश्वरसे थीसी भोर्बा भन्दा डाच्छा थेसे परमेश्वरदा ताड्ना लबा ताम चुग्यामसेन था याड्बा मुला।* 6 विश्वास आलना खालैसेन परमेश्वरदा ताड्ना लबारी आखम। तिगदा भिसम परमेश्वर मुबा ग्लारी खबा म्हिसे परमेश्वर मुला भिबा तामदेन थेदा म्हाइबा म्हिदा इनाम पिन्ना भिसी विश्वास लतोःला।

7 विश्वासग्यामसेन नोआसे थानोन आरेबा लिच्छा तसेला आम्राड्बा तामला बारेरी परमेश्वरसे कुल्बा अन्छार थेसे घेन पानी जहाज गिक सहोजी। ओच्छे थे पानी जहाज न्हडरी थेसे हाडला म्हेमेगदेदा थान्सी जोगब लजी। चुहड् लसी थेसे विश्वासग्यामसेन जम्बुलिडला म्हिगदेला दोष उन्जी। ओच्छे थे हाडला विश्वासग्याम परमेश्वरदा सेम निबा म्हि दोजी।*

8 विश्वास लबासे लमा अब्राहामसे परमेश्वरसे कुल्बा ताम ड्यानजी। ओच्छे थेदा पिन्ना भिसी कबुल लबा यहुलसारी परमेश्वरसे थेदा निउ भिसी कुल्जी। तर हाड खानडपट्टि निबान मुला भिबा था आरेसै थे हाडला यहुल्सा ख्लासी निजी।*

9 विश्वास लबासे लमा अब्राहाम परमेश्वरसे पिन्ना भिसी कबुल लबा यहुलसारी निसी विदेशी हड् लसी पाल फ्रेड्सी चिजी। थेहड् लसीन परमेश्वरसे इसहाकदेन याकूबदाएनोन थे यहुल्सा पिन्ना भिसी कबुल लजी। ओच्छे थेनीगदेएनोन अब्राहाम हड् लसीन

* 11:4 उत्प ४:३-१० * 11:5 उत्प ५:२१-२४ * 11:7 उत्प ६:१३-२२ * 11:8 उत्प १२:१-५

चिजी।* 10 तिग्दा भिसम अब्राहामसे परमेश्वर ह्वाडसेन म्हन्सी जुकजुकधोना चिबा जगथोरी सहोबा शहरदा भ्रान्सी चिबा मुबा।

11 विश्वासग्यामसेन दिड निसी जिन्सैनोन अब्राहाम आबा दोजी। साराएनोन कोला आतबाधोनान खुड दोसी जिन्बा मुबा। तसैनोन परमेश्वरसे पिन्ना भिसी लबा कबुलथोरी अब्राहामसे पूरान विश्वास लसी चिजी।* 12 अब्राहाम ल्हानान खेपूबा दोबासे लमा थेग्याम तिगै आशनोन आरेमुबा। तसैनोन थे महि गिकग्यामसेन मुला सारदेन समुन्द्रला बालुवा तेनोन झ्यानोन आखम्बा सन्तान तजी।*

13 परमेश्वरसे पिन्ना भिसी कबुल लबा सहेगदे आयाड्सैनोन चु जम्मान महिगदेसे सिबा धुडधोनाएनोन विश्वास लबा आख्लानी। तसैनोन थेनीगदेसे थे सहेगदेदा थारेडग्यामसेन म्राड्सी सेमरी किन्जी। ओच्छे थेनीगदेसे ह्वाड चा चु जम्बुलिडरी विदेशीदेन परदेशी हिन्ना भिसी म्हन्जी।* 14 चुहड्बा ताम लबा महिगदेसे ह्वाडलान यहुल्सा म्हाइबान मुला भिबा ताम प्रस्टन घोना लमुला। 15 थेनीगदेसे डाच्छा ह्वाडसे ख्लासी खबा यहुल्सादा ढन्सी आचिनी। चुदे थे यहुल्सादा ढन्बा हिन्सम थेनीगदे दोःसी थे यहुल्सारी निम्याड्सेला मुबा। 16 तर थेनीगदेसे चा चु भन्दान ज्यबा स्वर्गला यहुल्सा म्हाइबा मुबा। थेतबासेलमा थेनीगदेला परमेश्वर हिन्ना भिसी सुड्बारी परमेश्वर आपेःनी। तिग्दा भिसम परमेश्वरसे थेनीगदेदा पिन्बाला लागिरी शहर गिक सहोसी जिन्बा मुबा।

17-18 परमेश्वरसे अब्राहामला सेम च्याबा धुइरी विश्वाससे

* 11:9 उत्प ३५:२७ * 11:11 उत्प १८:११-१४; २१:२ * 11:12 उत्प १५:५; २२:१७; ३२:१२ * 11:13 उत्प २३:४; १ इति १९:१५; भजन ३९:१२

लमान अब्राहामसे हाडला झा इसहाकदा† बलि फुल्बारी तयार तजी। परमेश्वरसे अब्राहामदा “इसहाकग्यामसेन एला वंश बढब तला” भिसी कबुल लबा मुबा। तसैनोन अब्राहामसे विश्वासग्यामसेन हाडला गिक जेन झादाएनोन बलि फुल्बारी तयार तजी।* 19 तिग्दा भिसम परमेश्वरसे सिबाग्यामएनोन सोना लखम्ला भिबा अब्राहामदा विश्वास मुबा। ओच्छे अब्राहामसे विश्वास लबा अन्छारनोन हाडला झा इसहाकदा सिबाग्याम सोबा हड्बान दोःसी याड्जी।

20 विश्वाससे लमान इसहाकसे याकूबदेन एसावदा लिच्छा तसेला तामला बारेरी मोलम पिन्जी।*

21 विश्वाससे लमान याकूबसे सिबारी छ्याइबा धुइरी योसेफला झागदेदा मोलम पिन्जी। ओच्छे कडीला भररी राप्सी याकूबसे परमेश्वरला जयजयकार लजी।*

22 विश्वाससे लमान योसेफसे सिबा धुइरी इस्राएलीगदेसे मिश्र यहुल्सा ख्लाबा तामला बारेरी पाड्बा मुबा। थेसे थेनीगदेदा लिच्छा मिश्र यहुल्सा ख्लाबा धुइरी हाडला नखुगदे तिग लतोःला भिबा तामएनोन कुल्जी।*

23 विश्वाससे लमान मोशाला आबा आमासे थे न्हमाहेन्से ला सोमधोना छुम्सी थान्जी।† थेनीगदेसे हाडला झा ल्हानान जेबा म्राड्जी, ओच्छे ग्लेसे कुल्बा ताम आड्यानबारीनोन आलोड्नी।*

24 विश्वाससे लमान मोशासे हाड घेन तमाहेन्से फारो ग्लेला झामेला झा दोबारी आड्याननी।* 25 पाप लसी छिन्नड ताड्सी

† 11:17-18 हागारपट्टिला झा मुसैनोन अब्राहामसे इसहाकदा गिक जेन झा भिसी भिबा मुबा। तिग्दा भिसम इसहाक चा परमेश्वरसे कबुल लबा अन्छार न्हबा मुबा भिसम हागारपट्टिला झा चा अब्राहामला सेमसे म्हनबा अन्छार न्हबा मुबा।

* 11:17-18 उत्प २२:१-१४ * 11:20 उत्प २७:२७-२९, ३९-४० * 11:21

उत्प ४७:३१-४८:२० * 11:22 उत्प ५०:२४-२५; प्रस्था १३:१९ † 11:23 मिश्र

यहुल्साला ग्लेसे इस्राएलीगदेला झा न्हजी भिसम साडगो भिसी कुल्बा मुबा। * 11:23

प्रस्था १:२२; २:२ * 11:24 प्रस्था २:१०-१२

चिबा भन्दा मी बरु थेसे परमेश्वरला म्हिगदेदेन छ्यामनोन दुख नाबा सेम लजी। 26 मिश्र यहुल्साला जम्मान धन सम्पत्ति भन्दा बरु थेसे थार्बा पिन्बा ख्रीष्टला लागिरी दुख नाबा चा घेन सम्पत्ति म्हन्जी। तिग्दा भिसम थेसे परमेश्वरसे पिन्बा इनामदा च्यासी चिबा मुबा। 27 विश्वाससे लमान ग्लेला बोमो म्राड्सी आलोङ्गान थेसे मिश्र यहुल्सा ख्लाजी। ओच्छे म्राड्आखम्बा परमेश्वरदाएनोन म्राड्बा हड् लसीन थे भड्सी चिजी।* 28 विश्वाससे लमान मोशासे नाश लबा स्वर्गदूतसे इस्राएलीगदेला थेबा झागदेदा थासाडै भिसी बलिला का इस्राएलीगदे जम्मालान प्रापरी फोर्पुङ्जी। ओच्छे मिश्र यहुल्साग्याम फेसी खबा धिनदा ढन्सी धड्बा चाड धड्पुङ्जी।*

29 विश्वाससे लमान इस्राएलीगदेसे सरी भ्रबा हड् लसी वाला समुन्दरी भ्रसी क्याम्सडपट्टि निजी। मिश्र यहुल्साला म्हिगदेएनोन थेनीगदे हड् लसीन निबारी छ्याइमा डुबब तसी सिजी।*

30 विश्वाससे लमान इस्राएलीगदेसे निसरेधोना यरीहो शहरला पर्वाल क्युर्मा फुप्जी।* 31 विश्वाससे लमान राहाब भिबा बेश्या मिडम्हेमे परमेश्वरसे कुल्बा ताम आङ्गान्बा म्हिगदेदा साडबा धुइरी सोजी। तिग्दा भिसम थेसे थेरी चिवा लबारी निबा इस्राएलीगदेदा मान लबा मुबा।*

32 चु भन्दा ल्हाना डाइ तिग पाड्से? तिग्दा भिसम गिदोन, बाराक, शिमशोन, यिप्ता, दाऊददेन शमूएल ओच्छे स्य्हान्दो अगमवक्तागदेला बारेरी पाड्बाला लागिरी डादा धुइ आरे।* 33 विश्वाससे लमान थेनीगदेसे जम्मान यहुल्सागदेदा ढासी शासन लजी। थेनीगदेसे ठीक निसाफ लसी परमेश्वरसे पिन्ना भिसी

* 11:27 प्रस्था २:१५ * 11:28 प्रस्था १२:२१-३० * 11:29 प्रस्था १४:२१-३१

* 11:30 यहो ६:१२-२१ * 11:31 यहो २:१-२१; ६:२२-२५ * 11:32 न्याय ६:११-३२; ४:६-५:३१; ११:१-१२:७; १३:२-१६:३१; १ शमू १:१-२५:१; १ शमू १६:१-१ राजा २:११

कबुल लबा तामगदेएनोन याङ्जी। विश्वाससे लमान थेनीगदेसे च्यानगदेला सुड मुसी पिन्जी।* 34 थेहड्ड लसीन थेनीगदेसे मेला ल्हामदा साइजी, तरवारग्यामएनोन जोगब तजी। ओच्छे थेनीगदे कमजोर मुबा, तर भड्बा तजी। थेनीगदे लडाइ लमा आलोङ्नी ओच्छे अर्गु यहुल्साला जम्मान शत्रुगदेदा भ्रेना लजी।* 35 विश्वाससे लमान म्रिडम्हेमेगदेसे हाडला म्हिगदेदा सिबाग्याम दोःसी सोबा स्यापुजी।*

स्यहान्दोगदेसे चा सिमाहेन्से अझ ज्यबा जुनी याङ्बाला लागिरी मिश्र यहुल्साग्याम फेबा सेम आलना ल्हानान दुख नाजी। 36 कोइ कोइदा बेइज्जत लसी कोर्से तोजी, स्यहान्दोगदेदा चा च्याल्दासे खीसी झ्याल्खानरी झाङ्जी।* 37 म्हिगदेसे थेनीगदेदा युडबासे तोजी, आरासे क्लेजी, तरवारसे ताम्जी। ओच्छे थेनीगदेसे रादेन ग्युला ढि क्वान्जी। थेनीगदे प्राडबो, स्यहान्दोला हेला नाबान दुख नासी क्यारमार कोर्सी भ्रतोःजी।* 38 चु आज्यबा जम्बुलिड थेनीगदेला लागिरी गे खेल्बाधोनाला आरेबा। थेनीगदे तोडतोडबा ग्लादेन गडगदे ओच्छे ऊगदेरी क्यारमार कोर्सी भ्रतोःजी।

39 थेनीगदे जम्मासेन हाडसे लबा विश्वासला लागिरी ल्हानान मान याङ्जी। तर परमेश्वरसे पिन्ना भिसी कबुल लबा सहेगदे चा आयाङ्नी। 40 तिग्दा भिसम यह्हाडदेन छ्याम जे थेनीगदे तिगै दोष आरेबा म्हि दोगै भिसीन परमेश्वरसे यह्हाडला लागिरी डाच्छान ज्यबा सहे सहोसी थान्बा मुबा।

12

परमेश्वरला तहरी चिउ

* 11:33 दानि ६:१-२७ * 11:34 दानि ३:१-३० * 11:35 १ राजा १७:१७-२४;
२ राजा ४:२५-३७ * 11:36 १ राजा २२:२६-२७; २ इति १८:२५-२६; यर्मि २०:२;
३७:१५; ३८:६ * 11:37 २ इति २४:२१

1 य्हाडला क्युर्सीन चुदे ल्हाना विश्वास लबा म्हिगदे मुबासे लमा य्हाडदा ग्यामरी कोल्ना लबा ल्हानान सहेगदेदेन य्हाडदा सजिलोसे कोल्ना लबा पापगदेदा य्हाडसे भ्याङ्गे। ओच्छे य्हाड धोतोःबा ग्लाधोना आधोतेधोना ढुक्क तसी भ्रइ। 2 य्हाडला विश्वास शुरु लबादेन पूरा लबा येशूदा च्यासी भ्रइ। लिच्छा याड्बा ताड्बा तामला लागिरी थेसे बेइज्जत तसे तगै वास्ता आलना क्रुसरी दुख नाजी। दान्दे थे परमेश्वरला दाहिने छ्यापट्टिला मुल ठिरी धन्छ्याबा मुला।* 3 एनीगदेदा सुर्दा आतबादेन सदन विश्वासरी चिबाला लागिरी पापीगदेसे बेइज्जत लमा नाबा येशूदा च्यागो।

4 एनीगदे पापला शक्तिगदेदेन छ्याम छेमा सिबाधोना मी तबा आरे। 5 परमेश्वरसे एनीगदेदा हाडला झागदेदा हड् लसी बचनरी चुहड् लसी अर्ती पिन्बा ताम म्लेःजी?

“डाला झा, परमप्रभुसे लबा तहरी भ्रउ।

ओच्छे थेसे बड्मा दुख थाम्हन्गो।

6 तिग्दा भिसम जुन म्हिदा परमप्रभुसे माया लला थेदा हाडला तहरी थान्मुला।

ओच्छे हाडलान कोलागदे भिसी म्हन्बा जम्मादान थेसे सजाय पिन्मुला।”*

7 एनीगदेसे नाबा सजाय चा आबाला तहरी चिबा हिन्ना भिसी म्हन्गो। एनीगदेसे नाबा सजायग्यामसे परमेश्वरसे एनीगदेदा हाडलान कोलागदेदा हड् लसी व्यवहार लबा मुला भिबा ताम उन्बा मुला। हाडला आबाग्याम तोबा ग्याड्बा आनाबा कोलागदे खालै मुला? आरे। 8 चुदे जम्मान कोलागदेसे नाबा सजाय एनीगदेसे चा आनानी भिसम एनीगदे हाडलान आबाला कोलागदे आहिन, तर स्य्हान्दोदेन छ्याम ब्रेल्सी न्हबा कोलागदे हिन्ना। 9 चु जे आहिन,

* 12:2 भजन ११०:१ * 12:6 अय्यूब ५:१७; हितो ३:११-१२

य्हाड म्हिला मी आबासे हाडला कोलागदेदा तहरी थान्मुला, ओच्छे कोलागदेसे आबादा मान लमुबा। थेतबासेलमा झन य्हाडसे य्हाडला आत्माला आबा परमेश्वरला तहरी चितोःला। थेहड लजी भिसम य्हाडसे जुकजुकधोनाला जुनी याड्ला।

10 य्हाड म्हिला आबासे चा य्हाडदा तिगै धिनना लागिरी थेन्से ठीक भिसी म्हन्बा अन्छार तहरी थान्मुला। तर परमेश्वर आबासे सदनना लागिरी य्हाडदा ज्यबा तगै ओच्छे हाड हड्बान तिगै दोष आरेबा दोबाला लागिरी तहरी थान्मुला। 11 सजाय याड्बा धुइरी य्हाडदा सुख आहिन, तर ल्हाना दुख तमुला। तर य्हाड तहरी चिसी पाको दोबागदे परमेश्वरदा सेम निबादेन ज्यबा बानीबेहोर मुबा म्हि दोला।

12 थेतबासेलमा एनीगदेला घेबा यागदे थीगो। ओच्छे कमजोर काडगदे भड्बा तना लउ।* 13 एनीगदे सोजो ग्यामरी भ्रउ। जमाहेन्से कमजोर म्हिगदे आहिल, तर थेनीगदे ज्यना लसी भ्रखम्ला।*

परमेश्वरदा थाख्लागो भिसी पाड्बा

14 जम्मान म्हिगदेदेन छ्याम ढिक्सी चिबारीदेन परमेश्वरला डाच्छा तिगै दोष आरेबा म्हि दोबारी भड लउ। तिगदा भिसम परमेश्वरला डाच्छा तिगै दोष मुसम खालैसेन परमप्रभुदा म्राड्बारी आखम। 15 च्यागो, खालैनोन परमेश्वरला दयामाया आयाड्बा म्हि थादोगै। आज्यबा सेमग्याम खालैदान छेबा बड्बा तना थालगै, ओच्छे ल्हानान म्हिदा न्होड्ना थालगै। 16 खालैसेन आज्यबा बानीबेहोर थाथोगै। ओच्छे एसाव हड्बान परमेश्वरसे कुल्बा ताम आड्यानबा म्हि थादोगो। थेसे छाक गिक चबाला लागिरी थेबा झासे याड्तोःबा अधिकारदान चूड्जी।* 17 एनीगदेदा थानोन

* 12:12 यशै ३५:३ * 12:13 हितो ४:२६ * 12:16 उत्प २५:२९-३४

मुला, लिच्छा थेसे हाडला आबाग्याम मोलम किन्बारी म्हाइजी। ओच्छे क्रासी क्रासी हाडसे डाच्छा चूड्बा अधिकार दोःसी किन्बारी म्हाइजी। तर थेसे आयाड्नी। तिग्दा भिसम थेसे हाडसे लबा आज्यबा गे ख्लाबा मौकान आयाड्नी।*

18 एनीगदे इस्राएलीगदे हड् लसी थुर्बारी खम्बा सीनै भिबा गडरी खबा आरे। थेरी मेला ल्हाम थोन्बा मुबा, म्लाड म्लाडबा खसुसे घप्बा मुबा, ओच्छे लाबालुडसर खबा मुबा।* 19 इस्राएलीगदेसे बिगुलला घेन काइदेन परमेश्वरसे सुड्बा बचनएनोन थेःबा मुबा। चुहड्बा काइ थेःमाहेन्से थेनीगदेसे दाहेन्से दोःसी खाइमै थेःआतोःगै भिसी बिन्ती लबा मुबा। 20 तिग्दा भिसम थेनीगदेदा “चुदे खजिबै जन्तुसे चु गड थुर्जी भिसैनोन थेदा युडबासे तोसी साइगो” भिसी कुल्बा ताम थेनीगदेसे नाबारी आखम्नी।* 21 मोशाएनोन थे ताम म्राड्सी ल्हानान लोड्बा मुबा। थेतबासेलमा, “डा लोड्सी फितफित धर्बा मुला” भिसी मोशासेनोन पाड्बा मुबा।*

22 तर एनीगदे मी सियोन गडरी खबा मुला। ओच्छे झ्यासीन झ्याबारी आखम्बाधोनाला स्वर्गदूतगदे ताड्सी पोप तसी छोन्बो परमेश्वरला स्वर्गला यरूशलेम शहररी खबा मुला। 23 एनीगदे स्वर्गरी मिन भिसी जिन्बा डाच्छा न्हबा परमेश्वरला कोलागदेला† सभारी खबा मुला। ओच्छे एनीगदे जम्मान महिला निसाफ लबा परमेश्वर मुबा ग्लारीदेन परमेश्वरला डाच्छा ज्यबा म्हिगदेला आत्मा मुबा ग्लारीनोन खबा मुला। 24 एनीगदे येशू मुबा ग्लारी खबा मुला। येशूसे चा एनीगदेदा परमेश्वरदेन छ्याम ढिक्ना लबाला लागिरी छार कबुल सहोबा मुला। ओच्छे एनीगदे

* 12:17 उत्प २७:३०-४० * 12:18 प्रस्था १९:१६-२२; २०:१८-२१; व्यव ४:११-१२; ५:२२-२७ * 12:20 प्रस्था १९:१२-१३ * 12:21 व्यव ९:१९ † 12:23 “डाच्छा न्हबा परमेश्वरला कोलागदे” भिबा चा परमेश्वरदा डाच्छान विश्वास लबा म्हिगदे हिन्ना।

हाबिलला कासेर् भन्दा अझ ज्यबा ताम लोप्बा का स्वाबा ग्लारी खबा मुला।*

25 होशियार तसी चिउ, एनीगदेसे हाडदेन छ्याम ताम पाड्बा परमेश्वरला ताम ड्यान्बारी थाख्लागो। तिग्दा भिसम चु जम्बुलिडला म्हि मोशासे कुल्बा ताम इस्राएलीगदेसे आड्यान्मा सजायग्याम स्योरआम्याड्नी। इन य्हाडसे स्वर्गग्याम कुल्बा परमेश्वरला ताम आड्यान्नी भिसम य्हाड खाहड् लसी स्योर्ख्म्ला?*

26 परमेश्वरसे सीनै गडरी ताम लमा जम्बुलिडनोन य्होड्जी। तर दान्दे परमेश्वरसे चुहड् भिसी कबुल लबा मुला, “दाहेन्से अझ तिरम जम्बुलिड जे आहिन, तर डाइ स्वर्गन य्होड्ना लला।”*

27 चु “अझ तिरम” भिबा तामग्याम जम्बुलिडरी मुबा जम्मान सहेगदे नाश तला भिबा हिन्ना। चु भिबा चा आय्होड्बा सहेगदे चा नाश आत।

28 थेतबासेलमा आय्होड्बा य्हुल्सा य्हाडसे याड्बासे लमा परमेश्वरदा धन्यवाद पिन्गे। थेहड् लसीन परमेश्वरदा सेम निबा गे लसी थेदा सदन मान लबान जयजयकार लइ। 29 तिग्दा भिसम य्हाडला परमेश्वर नाश लबा मे हड्बान मुला।*

13

परमेश्वरदा ताड्ना लबा गे

1 गिकसेम गिकदा ज्योज्यो आले नाना आडादा हड्नोन सदन माया लउ। 2 डोआसेबा डोन्बोगदेदा मान लबारी थाख्लागो। चुहड् लसी डोन्बोदा मान लमा कोइ कोइसे था आयाड्ना स्वर्गदूतदाएनोन मान लबा मुबा।* 3 हाडएनोन झ्याल्खानरी

† 12:24 हाबिलला काग्याम सजाय याड्जी भिसम येथूला काग्याम जम्मान म्हिसे पापला माफ याड्जी (उत्प ४:११-१२ सहीगो)। * 12:24 उत्प ४:१० * 12:25 प्रस्था २०:२२ * 12:26 हागै २:६ * 12:29 व्यव ४:२४ * 13:2 उत्प १८:१-८; १९:१-३

मुबा हड्बान म्हन्सी झ्याल्खानरी मुबागदेदा वास्ता लउ। ओच्छे हाडलान लहुइरी दुख याड्बा हड्बान म्हन्सी दुख याड्बागदेदाएनोन वास्ता लउ।

4 ब्याह चा जम्मान म्हिला ओन्छाडरी ज्यबा ततोःला। ओच्छे म्रिड हेम्बो न्हडरी खाइमै आज्यबा तबारी आत। तिग्दा भिसम आज्यबा बानीबेहोर थोसी स्य्हान्दोला म्रिड हेम्बोदेन छ्याम ब्रेल्सी भ्रबागदेदा परमेश्वरसे सजाय पिन्ना।

5 एनीगदे धन सम्पत्तिला लिच्छा थाभ्रउ, हाडदेन छ्याम जुन सहे मुला थेरीन ताड्सी चिउ। तिग्दा भिसम परमेश्वरसे चुहड् भिसी सुड्बा मुला,

“डाइ एदा तिगै लसीन आख्ला,

डाइ एदा खाइमै थारेड आथान।”*

6 थेतबासेलमा य्हाड ढुक्क तसी पाड्गे,

“प्रभुसेन डादा हो लबा मुला,

थेतबासेलमा डा खाइमै आलोड्।

तिग डादा म्हिसे तिगै लबारी खम्ला? आखम।”*

7 एनीगदेदा परमेश्वरला बचनग्याम लोप्बा मण्डलीदा च्याबा म्हिगदेदा ढन्गो। थेनीगदेला गाते ज्यबा बानीबेहोर मुबा थे घोउ। ओच्छे एनीगदेसेनोन थेनीगदेसे लबा हड्बान विश्वास लउ। 8 येशू ख्रीष्ट मी तिल्मा, तिनी ओच्छे सदन गिकनोन मुला। 9 एनीगदेदा था आरेबा खजिबै छार तामगदेसे एनीगदेदा सत्य तामग्याम थाफेगै। चबा थुड्बाला ठिमसे आहिन, तर परमेश्वरला दयामायासे सेमदा भड्ना लबा चा ज्यबा हिन्ना। चबा थुड्बाला ठिम अन्छार भ्रसी आत्माला लागिरी तिगै फाइदा आरे।

* 13:5 वयव ३१:६, ८; यहो १:५ * 13:6 भजन ११८:६

10 यहूदीगदेला चोखो ग्लारी पूजा लबा म्हिगदेदा य्हाडला बलि फुल्बा ग्लारी तिगै चबा अधिकार आरे।† 11 डाच्छाला ठिम अन्छार परमेश्वरला मन्दिररी पूजा लबा मुल म्हिसे पापला लागिरी बलि फुल्बा जन्तुला का पाल न्हडला जम्मान भन्दा चोखो ग्लारी भोर्सी निमुबा। तर थे जन्तु चा शहरग्याम मडग्यार भोर्सी खाड्मुला।* 12 थेतबासेलमा येशूसेनोन ह्हाडलान काग्याम म्हिगदेदा पापग्याम फेसी चोखो स्होबाला लागिरी शहरला मडग्यार निसी सिजी। 13 थेतबासेलमा य्हाडएनोन शहरला मडग्यार येशू मुबा ग्लारी निसी थेसे नाबा ह्हाडबान बेडज्जत नागे। 14 तिग्दा भिसम चु जम्बुलिडरी सदन चिबाला लागिरी य्हाडला शहर आरे। तर य्हाडसे मी लिच्छा खबा शहरला ग्याम च्यासी चिबा मुला।

15 थेतबासेलमा य्हाडसे येशूग्याम परमेश्वरदा सदन जयजयकारला बलि फुल्गे। चु थेला मिन किन्बागदेला सुडग्याम फुल्बा बलि हिन्ना। 16 गिकसेम गिकदा ज्यबा लबारीदेन ह्यो लबारी थाख्लागो। तिग्दा भिसम परमेश्वरदा सेम निबा बलि चुनोन हिन्ना।

17 एनीगदेसे ह्हाडला मण्डलीदा च्याबा म्हिगदेसे कुल्बा ताम ड्यान्सी थेनीगदेला तहरी चिउ। थेनीगदेला गे चा एनीगदेला आत्मादा वास्ता लबा हिन्ना। ओच्छे थेनीगदेसे एनीगदेला लागिरी लबा गेला हिसाब परमेश्वरदा उन्तोःला। एनीगदेसे थेनीगदेला ताम ड्यान्जी भिसी थेनीगदेसे ताड्सी ताड्सी ह्हाडला गे लला। तर थेह्हाड आलसम थेनीगदेसे दुख ड्हम्ला, ओच्छे एनीगदेला लागिरी तिगै ज्यबा आत।

† 13:10 तिग्दा भिसम थेनीगदेसे डाच्छाला ठिम अन्छार पूजा लबा तामथोरी भर लमुबा। ओच्छे थेनीगदेसे प्रभु येशूथोरी चा भर आलमुबा। य्हाडला लागिरी बलि फुल्बा ग्ला चा येशूला क्रुस हिन्ना। * 13:11 लेवी १६:२७

18 डन्ना लागिरी सदन प्रार्थना लउ। डन्से म्हन्बा अन्छार डन्से तिगै गल्ती लबा आरे भिबा ताम डन्दा पक्का मुला। तिग्दा भिसम सदन ज्यबा गे लबा डन्ना सेम मुला। 19 डा दोःसी एनीगदे मुबा ग्लारी योनान खखमगै भिसी एनीगदेसे डाला लागिरी प्रार्थना लसी पिन्गो भिबा डाला बिन्ती मुला।

प्रार्थना

20 शान्तिला परमेश्वरसे जम्मान ग्युगदेला मुल गोठालो य्हाडला प्रभु येशूदा सिबाग्याम सोना लजी। ओच्छे थेला काग्याम जुकजुकधोना चिबा कबुल पूरा लजी। 21 एनीगदेसे परमेश्वरसे म्हन्बा गे लबाला लागिरी प्रभु येशूग्याम एनीगदेदा जम्मान ज्यबा तामगदेसे प्लिङ्ना लगै। ओच्छे परमेश्वरदा सेम निबा गेगदे लबारी खमगै भिसी येशू ख्रीष्टग्याम एनीगदेला सेमरी गे लगै। येशू ख्रीष्टला सदन मानदेन जयजयकार तगै। आमेन।

22 ज्योज्यो आले नाना आडागदे, एनीगदेदा डाला चु बिन्ती मुला, एनीगदेदा आँट पिन्बा चु ताम आछेर्ना ड्यानगो। डाइ एनीगदेदा ल्हाना ताम भिबा आरे। 23 य्हाडला आले तिमोथीएनोन झ्याल्खानग्याम थोन्सी जिन्बा मुला भिबा ताम डाइ एनीगदेदा पाङ्ला। थे योनान खजी भिसम डा थेदेन छ्यामनोन एनीगदे मुबा ग्लारी खला। 24 एनीगदेला जम्मान मण्डलीदा च्याबा म्हिगदेदेन परमेश्वरला जम्मान म्हिगदेदा फ्याफुल्ला। इटालिया यूहुल्साला विश्वासीगदेसेनोन एनीगदेदा फ्याफुल्ला भिसी पाङ्बा मुला। 25 एनीगदे जम्मानदेन छ्याम परमेश्वरला दयामाया तगै। आमेन।

परमेश्वरला बचन छार कबुल New Testament in Tamang, Eastern

Copyright © 2011 Eastern Tamang Language Team

Language: Eastern Tamang (Tamang, Eastern)

Translation by: Wycliffe Bible Translators

Contributor: Wycliffe Bible Translators, Inc.

Copyright Information

© 2011, Wycliffe Bible Translators, Inc. and Eastern Tamang Language Team.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

Printed book ISBN 9789937221221

The New Testament

in Tamang, Eastern

© 2011, Wycliffe Bible Translators, Inc. and Eastern Tamang Language Team.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2015-03-17

Updates

eBible.org

PDF generated using Haiola and XeLaTeX on 3 Jul 2018 from source files dated 14 Jun 2018

75fec6d5-7473-5018-a7c0-dd9740a83748